

فريق التفريغ بموقع الطريق إلى الله

يقدم

من سلسلة التربية بالقرآن

هتوصل إمتى؟

"باللهجة المصرية"

لفضيلة الشيخ : حازم شومان

رابط المادة : <http://way2allah.com/khotab-item-5581.htm>



الحمد لله وكفى وصلاةً وسلاماً على عباده الذين اصطفى، اللهم لك الحمد كله، ولك الملك كله، وبيدك الخير كله وإليك يُرجع الأمر كله، الحمد لله عدد ما خلق، الحمد لله ملء ما خلق، الحمد لله عدد ما في السماوات وما في الأرض، الحمد لله عدد ما أحصى كتابه، والحمد لله على ما أحصى كتابه، والحمد لله عدد كل شيء، والحمد لله ملء كل شيء.

اللهم صلّ على محمد، وعلى آل محمد، كما صليت على إبراهيم، وعلى آل إبراهيم، إنك حميدٌ مجيد، اللهم بارك على محمد، وعلى آل محمد، كما باركت على إبراهيم، وعلى آل إبراهيم، إنك حميدٌ مجيد.

اللهم صلّ على عبدك ونيك محمد عدد خلقك ورضا نفسك وزنة عرشك ومداد كلماتك، ثم أما بعد:

ما زلنا بإذن الله سبحانه وتعالى مع السلسلة يعني اللي أنا بعترها بالنسبة ليا أنا وبالنسبة لأي إنسان يريد أن يصل إلى الله يا جماعة سلسلة في غاية الخطورة "سلسلة قواعد السير إلى الله من خلال القرآن وقصص الأنبياء" أو "سلسلة أصول الوصول إلى الله من خلال قصص الأنبياء ومن خلال القرآن".

إزاي نوصل لرينا؟

إزاي نرتب دماغنا؟ في ناس كثير عندها رغبة إلى الله بس مهوش عارف يرتب دماغه، يوصل إزاي؟ يعمل إيه؟ مهوش فاهم الطريق، مهوش عارف يتعامل مع الطريق إزاي؟ هو حاسس إنه ساعات يتأخر، وساعات يتعطل، وساعات يقعد يلف حوالين نفسه شوية، هو عاوز ينطلق.

السلسلة دي هدفها إن هي تعرفك إزاي توصل إلى الله، إزاي تبقى سريع في انطلاقك إلى الله، إزاي تبقى أسرع من كل اللي حواليك في الوصول إلى مولاك سبحانه وتعالى.

يعني إحنا هنتكلم إن شاء الله بإذن الله النهاردة إحنا قولنا يا إما هناخد درس في شكل قواعد يا إما هناخد حاجة جزء من القرآن ونقعد نستخلص منه قواعد.

كانت مشاعرهم صادقة مع الله.. فرفعهم الله درجات عالية.

النهاردة هناخد قصة من قصص سيدنا إبراهيم في كتاب الله سبحانه وتعالى، أحبّ جزء إلى قلبي في كتاب الله الجزء دا، هو الإمام كان بيقرأه في صلاة الفجر اللي فاتت كان نفسي والله العظيم إنه يغلط فيه، تخيل! طب يغلط فيه؟ عشان يكرر عشان يضطر إنه يعيد الآيات ويجبها من الأول تاني من كتر النور اللي يبشع من كل حرف ولفظ في هذه الآيات.

قول الله سبحانه وتعالى: "وَإِذْ قَالَ إِبْرَاهِيمُ لِأَبِيهِ عَارِزَ اتَّخِذْ أَصْنَامًا ءِلهَةً إِنِّي أَرَاكَ وَقَوْمَكَ فِي ضَلَالٍ مُّبِينٍ * وَكَذَلِكَ نُرِي إِبْرَاهِيمَ مَلَكُوتَ السَّمَاوَاتِ وَالْأَرْضِ وَلِيَكُونَ مِنَ الْمُوقِنِينَ" الأنعام:73-75

وبعد كذا رحلة المجاهدة الرهيبة والانطلاق الرهيب إلى الله والبحث والوصول..

"فَلَمَّا جَنَّ عَلَيْهِ اللَّيْلُ رَأَى كَوْكَبًا" الأنعام:76 رأى القمر، رأى الشمس لغاية ما يوصل ل "إِنِّي وَجَّهْتُ وَجْهِيَ لِلَّذِي فَطَرَ السَّمَاوَاتِ وَالْأَرْضَ" الأنعام:79 وبعد ذلك لابد من التمحيص فانتبه "وَخَاجَهُ قَوْمَهُ" الأنعام:80 لازم هتلاقى حاجة وقفت في وشك وبعد كذا ربنا سبحانه وتعالى يقول: "وَتِلْكَ حُجَّتُنَا ءَاتَيْنَاهَا إِبْرَاهِيمَ عَلَى قَوْمِهِ نَرْفَعُ دَرَجَاتٍ مِّنْ نَّشَاءٍ" الأنعام:83.

نرفع إيه؟ "دَرَجَاتٍ" درجات جايه نكرة كأن ربنا بيقولك أنا ممكن أرفعك، عارف لما يقولك ربنا هيرفعك يابني لحد ما الخلق تستعجب في رفعتك؟ أهي دي نرفع درجاتك ربنا هيرفعك لغاية ما تبقى آية "وَلِتَكُونَ ءَايَةً لِّلْمُؤْمِنِينَ" الفتح:20 إيه دا؟ هو ممكن ربنا يفتح على حد كده؟ يفتح على قلب حد كده؟ يفتح على إيد حد في الدين كده؟ يفتح لحد الطريق للدرجة دية؟

"نَرْفَعُ دَرَجَاتٍ مِّنْ نَّشَاءٍ إِنَّ رَبَّكَ حَكِيمٌ عَلِيمٌ * وَوَهَبْنَا لَهُ إِسْحَاقَ وَيَعْقُوبَ" الأنعام:84،83

قمة من قمم البشرية السابقة هتذكر ورا بعضها، يا جماعة الآيات الثلاث آيات دول اللي جايين أسماء الأنبياء، لو عشت بقلبك مع اسم نبي نتحس إنك في عالم تاني خالص، الربع ده جاب قمم البشرية كلها جمعها في الربع ده، عشان كده ده من أخطر أسباب عظمة هذا الربع..

جاييلك الناس اللي كان معرفة الله في قلبها طوفان مشاعر، طوفان مشاعر في قلبها تجاه الله، قلوبها كانت زي البراكين الثائرة من كتر اللي في قلبها تجاه ربنا، ناس كانت ماشية اللي في قلبها تجاه ربنا في الركوع والسجود والنوم واليقظة والخلوة والاختلاط، اللي كان في قلبهم تجاه ربنا مشاعر فياضة "وَوَهَبْنَا لَهُ إِسْحَاقَ وَيَعْقُوبَ كُلًّا هَدَيْنَا وَنُوحًا هَدَيْنَا مِن قَبْلُ وَمِن ذُرِّيَّتِهِ دَاوُدَ وَسُلَيْمَانَ وَأَيُّوبَ وَيُوسُفَ وَمُوسَى وَهَارُونَ وَكَذَلِكَ نُجْزِي الْمُحْسِنِينَ * وَزَكَرِيَّا وَيَحْيَى وَعِيسَى وَإِلْيَاسَ كُلٌّ مِّنَ الصَّالِحِينَ * وَإِسْمَاعِيلَ وَالْيَسَعَ وَيُونُسَ وَلُوطًا وَكُلًّا فَضَّلْنَا عَلَى الْعَالَمِينَ" الأنعام:84،86

إيه ده يا جماعة؟ يا إخوانا كل اسم من الأسماء دي إمام من أئمة البشرية في الوصول إلى الله.

من قوة تسبيحه.. الدنيا كلها سبّحت معه

"وَمِن ذُرِّيَّتِهِ دَاوُدَ" داوود دا اللي كان يقعد يسبح ربنا من أول الفجر ما يطلع لحد المغرب ما تيجي لغاية ما الليل ييجي، من قوة قلبه في التسبيح الجبال والصخر كانت بتسبح معاه والطيور بأنواعها وأشكالها وألوانها تيجي تسبح معاه، يعني إنسان كان اتصال قلبه بالله اتصال رهيب، داوود أحسن قيام وأحسن صيام وأعلى اتصال قلب بالله.

اللي كان وميض النور ما بين عينيه، ظهر نظر سيدنا آدم عليه السلام من وسط الخليقة كلها، إيه داوود؟؟ "دَاوُدَ وَسُلَيْمَانَ" سليمان اللي لما الخيل عطلته عن ذكر الله دقائق دبح عشرين ألف فرس، عشرين ألف صفيينات جياذ

عشان عطلته عن ذكر الله دقائق، إيمان في حب الله.

يُكْفِرُ عَنْ ذَنْبٍ لَمْ يَفْعَلْهُ؛ لَشَدَّةِ حُبِّهِ لِلَّهِ

وأيوب أيوب إيمان في معرفة الله وحب الله، أيوب اللي كان كما في صحيح ابن حبان لما كان بيمر على اتنين بيُقَسِّمُوا بالله، يعني واحد بيقوله "والله دي واقفة عليا بكذا" يقوله "والله دي بكذا" يروح يُكْفِرُ عن الاتنين، لبيه؟ حتى لا يُذَكَر اسم الله على باطل، اسم مولاي وحببي..

لعل يكون واحد من الاتنين كداب، أضمن منين؟ ممكن الاتنين كداين وأنا مش هسيبهم هُما ودينهم، أنا أروح أنا أَكْفِرُ عن إن اسم مولاي لا يُذَكَر على باطل، إيمان في حب الله، وتعظيم مقام الله، كلمة "الله" دي كانت كلمة بيرتجف ليها قلبه، تخيلوا يا جماعة.

ملك على خزائن الأرض كلها.. لكنه لا يريد إلا الآخرة

ويوسف.. يوسف إمام في حب الله، يوسف اللي لما اتهم في شرفه قال كلمة واحدة:

"هِيَ رَاوَدَتْنِي عَنْ نَفْسِي" يوسف: 26، ربنا اتهم في وحدانيته.. في السجن شاف الاتنين التانيين المشركين اتكلم صفحة ونص عن ربنا، كلام يتشرح في مجلدات يعني..

ولما وصل للملك والدنيا كلها بقت في إيديه قال: **"تَوَفَّنِي مُسْلِمًا" يوسف: 101** مش عايز الدنيا أنا عايزك إنت يارب، أنا عايزك تاخديني إليك يارب.

إمام الشوق إلى الله

وموسى.. موسى أعلى إمام في البشرية كلها في الشوق إلى الله، موسى رغم إن قبره روضة من رياض الجنة، لما الرسول مر في رحلة الإسراء لقاها واقف بيصلي، ساب النعيم كله وساب الجنة وواقف يصلي بين إيدين ربنا، موسى اللي أول ما يُبعث من تحت التراب يَهْرَع إلى عرش الله من شدة الشوق إلى الله و يبطش بقائمة من قوائم العرش. موسى اللي قال: **"وَعَجِلْتُ إِلَيْكَ رَبِّ لِتَرْضَى" طه: 84** مش قادر أستنى يارب، مش قادر أتحمك في نفسي، عايز أنطلق إليك يا رب.

موسى اللي قال: **"قَالَ رَبِّ ارْنِي أَنْظُرَ إِلَيْكَ" الأعراف: 143** من شدة الشوق إلى الله سبحانه وتعالى.

عاملوا الله بصدق.. فأذهلهم بعطائه

"وَمُوسَى وَهَارُونَ وَكَذَلِكَ نَجْزِي الْمُحْسِنِينَ * وَزَكَرِيَّا وَيَحْيَى وَعِيسَى وَإِلْيَاسَ" مين زكريا، يحيى، وعيسى يا جماعة؟؟ دول أنبياء بني إسرائيل، قصص أنبياء بني إسرائيل في سورة مريم، كدا "قصة مريم، وقصة عيسى، وقصة زكريا" أخطر حاجة فيها إن القصص دي كلها قصص ناس عاملت ربنا بلا أسباب فعاملها بلا أسباب..

تبقى مذهول وإنت قاعد بتقرأ قصصهم.

مريم يتنزل عليها رزق الصيف في الشتاء والشتاء في الصيف، هي بتصلي والملايكة نازلة لها بالطعام بتاعها.
وسيدنا زكريا بعد ما بلغ من الكبر عتياً.. ربنا يديله ولد بركعتين ياخداهم من خزائن الله.
وسيدنا عيسى يبجي من غير أب.. والسيدة مريم تمز النخلة يتساقط عليها رطباً جنيباً.. وسيدنا عيسى ينطق في المهدي.
أنبياء بني إسرائيل أخطر نقطة في قصصهم إنهم عاملوا الله بلا أسباب فعاملهم الله بلا أسباب، إحنا بنتكلم دلوقتي يا
جماعة في الربع دا عن قمم البشرية، عن المؤمنين اللي كانت قلوبهم طوفان مشاعر تجاه الله سبحانه وتعالى.

عش بقلبك مع قصة سيدنا إبراهيم عليه السلام

هنبدأ دلوقتي من أول الربع نتكلم عن قصة سيدنا إبراهيم، كل كلمة هنخرج منها قاعدة في الطريق إلى الله، كل كلمة
من كلمات هؤلاء الأقسام العظماء هنخرج منها أصل تقدر توصل بيه لربنا، ركز معايا وعيش معايا.
السلسلة دي معمولة للي عايز يوصل يا جماعة، السلسلة دي معمولة للي ربنا أعلى عنده من شهادته، من دينته، للي
ربنا أعلى عندها من جوازها، ومن حياتها، ومن أي حاجة في الدنيا..
السلسلة دي معمولة للراغبين إلى الله، اللي شعار حياتهم "كيف الوصول إليك؟" أوصلك إزاي يارب؟ أنا عايز أعرف
الطريق إليك وأنا أنطلق يارب.

"وَإِذْ قَالَ إِبْرَاهِيمُ لِأَبِيهِ أَرَزَرَأْتَتَّخِذُ أَصْنَامًا آلِهَةً" إزاااي؟؟ إزاي شوية الأحجار دي تبقى آلهة؟ "إِنِّي أَرَأَيْتُ أَنَا عَايِزُكَ تَرْكُزُ
مَعَايَا أَرَأَيْتُكَ، أَرَأَيْتُكَ أَنَا شَايْفُكَ "إِنِّي أَرَأَيْتُكَ وَقَوْمَكَ فِي ضَلَالٍ مُّبِينٍ" الأنعام:74 لا يمكن تكونوا صح، لا يمكن يكون
الناس اللي بره دول صح، لا يمكن يكون المعاصي اللي بيعصى بيها ربنا دي صح، لا يمكن..
يقين.. إبراهيم يا جماعة بدأ يشوف الباطل باطل، شوفوا ربنا يقول بعدها إيه؟ "وَكَذَلِكَ نُرِي إِبْرَاهِيمَ مَلَكُوتَ
السَّمَوَاتِ وَالْأَرْضِ" الأنعام:75 وكذلك إيه؟ "نُرِي" مش يرى، "نُرِي" أنا اللي وريته، أنا اللي خلينته يشوف، أنا اللي
أطلقت بصيرته.

طب ليه يارب وريته؟ إشعنى إبراهيم؟ ما كانت الأرض عليها ألوف مؤلفة، إشعنى إبراهيم اللي وريته؟ اسمع بقى: الفتح
على قدر حال قلبك مع الله.

القاعدة الأولى: الفتح على قدر حال قلبك مع الله

ربنا عالم في قلب إبراهيم نور مكنش حد شايفه غير ربنا؛ فخللاه يشوف فوراه.. فأطلق بصيرته عن دون الناس كلها،
زي ما الرسول يقول: "اللهم أعز الإسلام بأحب هذين الرجلين إليك، بأبي جهل أو بعمر بن الخطاب، قال وكان
أحبهما إليه عمر" سنن الترمذي.

يعني إيه أحب العمرين؟ اللي إنت تعلم في قلبه خير محدش شايفه غيرك يارب، هو مطموس بالمعاصي، إنت يا ترى في
قلبك خير قد إيه؟ فتح ربنا عليك على قدر حال قلبك، ربنا بيعامل قلبك خد بالك.

شوفوا يا جماعة الصحابة يا جماعة شوفوا قلوبهم وصلت لإيه؟ شوفوا عشان تعرفوا، ربنا هبوربهم حاجات ولا لا؟ قولوا يارب وربنا يارب.

كان أحد الإخوة يقول أنا بحب أوي دعاء "اللهم أرني الحق حقًا وارزقني اتباعه، وأرني الباطل باطلًا وارزقني اجتنابه"، إن ربنا يورك، إنه يُطلق بصيرتك، تخيلوا لما الصحابة رضي الله عنهم يوصلوا لمقام، شوفوا القلوب وصلت لإيه؟ **"وَلَقَدْ كُنْتُمْ تَمَنَّوْنَ الْمَوْتَ مِنْ قَبْلِ أَنْ تَلْقَوْهُ"** آل عمران: 143 قلت سبحان الله **"تَمَنَّوْنَ الْمَوْتَ"** الصحابة من كتر شوقهم إلى الله وشوقهم إلى الجنة كان أعلى أمنية في حياتهم إنهم يموتوا، إحنا مين فينا وصل للدرجة دي؟ شوف ربنا يقول إيه؟ **"إِنْ يَعْلَمِ اللَّهُ فِي قُلُوبِكُمْ خَيْرًا يُؤْتِكُمْ خَيْرًا"** الأنفال: 70 يا جماعة قلبك دا على حسب حاله على حسب ما ربنا هيفتح عليك.. قلبك حاله إيه مع الله؟

سيدنا إبراهيم شوفو يقول إيه؟ **"وَقَالَ إِنِّي مُهَاجِرٌ إِلَى رَبِّي"** العنكبوت: 26 مهاجر.. ما قالش سأهاجر، "سأهاجر" يعني أنا دلوقتي هسيكوا وأروح مكان تاني، إنما "مهاجر" خلاص أنا قررت إن أنا هعيش مهاجر ليك يارب، أنا ماعدش هيبقى ليا وطن ولا سكن ولا مكان، أنا هيفضل صفتي في حياتي طول عمري إن أنا مهاجر. ههجر أي حاجة تعبدني عنك يارب، ههجر أي حاجة تعطلي عنك يارب **"إِنِّي مُهَاجِرٌ إِلَى رَبِّي"**.

أول ما الواحد التزم كان أمنية حياته إنه يشيل هدومه على كتفه ويلف الدنيا كلها يدعو الناس لربنا ويتكلم عن دين الله، طب ما أكيد منكوا برضو كتير كده، أومال إيه الفرق بينا وبين إبراهيم؟ **إِنَّ إِحْنَا لَمَّا حَسِينَا بَدَهُ.. وَقَفْنَا وَانْشَغَلْنَا، إِنَّمَا إِبْرَاهِيمَ لَمَّا حَسَّ بِيَهُ.. كَمَلَّ وَانْطَلَقَ، مَفِيشَ حَاجَةَ وَقَفْتَهُ وَلَا عَطَلْتَهُ، "إِنِّي مُهَاجِرٌ إِلَى رَبِّي"** مفيش حاجة هتعطلي عنك يارب، ههجر، أنا معدتش ليا وطن ولا سكن لغاية ما أوصلك يا مولاي. شايفين يا إخوانًا الناس وصلت لدرجة إيه؟ شايفين المشاعر اللي في قلوبهم؟

"وَكَذَلِكَ نُرِي إِبْرَاهِيمَ" يعني إيه **"وَكَذَلِكَ"**؟ إسمع بقى.. أي كما أريناه الباطل باطلًا، زي ما وريته إن أبوه وقومه في ضلال مُبِين سَأْرِيَهُ الْحَقَّ حَقًّا، هوربِهِ مَلَكُوتِ السَّمَاوَاتِ وَالْأَرْضِ، وَهَخَلِيهِ مِنَ الْمُوقِنِينَ، رَبَّنَا مَعَ إِبْرَاهِيمَ لَغَايَةَ مَا يَرْقِيهِ لِلْكَمَالِ الْبَشَرِيِّ، لَغَايَةَ مَا يَبْقَى خَلِيلِ الرَّحْمَنِ، إِنْ رَبَّنَا يَظَلُّ مَعَاكَ طُولَ الطَّرِيقِ، إِنْ رَبَّنَا مَيْسَبِكْش، إِنْ رَبَّنَا هُوَ اللَّيِّ يَرْقِيكَ مِنْ مَقَامٍ لِمَقَامٍ.

عشان كدا سيدنا إبراهيم يقول بعدها إيه يا جماعة؟ **"وَكَذَلِكَ نُرِي"** خدوا بالكوا **"نُرِي"** دي.. أنا اللي هوربه، يعني لو مورتكش منتاش هتشف..

سيدنا نوح يقول **"يَا قَوْمِ أَرَأَيْتُمْ إِنْ كُنْتُمْ عَلَىٰ بَيِّنَةٍ مِّن رَّبِّي"** هود: 28، أنا مكنتش شايف حاجة قبل هو ما يوربني، أنا مكنتش حاجة قبله أصلًا، أنا مكنتش أي شئ قبل ربنا ما يوربني..

"أُوَلِّكَ عَلَىٰ هَذِهِ مِّن رَّبِّمْ" البقرة: 5، لو ربنا ما إداكش منتاش هتاخذ، لو ربنا ماوركش منتاش هتشف، عشان كده بعدها **"فَلَمَّا جَنَّ عَلَيْهِ اللَّيْلُ رَأَىٰ كَوْكَبًا"** الأنعام: 76، رأى القمر، رأى الشمس، المرة دي بقى مش رأى زي أي

مرة، المرة دي يا جماعة سيدنا إبراهيم وصل لربنا من خلال الكوكب والقمر والشمس، طب ما هو طول عمره يبص للكوكب والقمر والشمس إشعنا المرة دي؟

القاعدة الثانية: الفتح على قدر المهم

على قدر المهم اللي في قلبك على قدر الفتح، المرة دي سيدنا إبراهيم يبص للقمر والشمس والكواكب آه، بس بهدف الوصول إلى الله، يعني إنت ممكن تقرأ تقول أنا بقرأ كل يوم جزء من القرآن وحاسس بفتور، لبيه؟؟ أصل إنت بتقرأ من غير هدف، إنت بتقرأ وخلص، إنما لو إنت بتقرأ صفحة في اليوم بِمَّ الوصول إلى الله، يارب أنا بقرأ الصفحة دي عشان أعرف مرادك مني إيه؟ جَرَّب ..

أنا لما مجربها على نفسي والله العظيم الواحد بيوصل لكنوز، أما آجي أنا الليلة.. يارب هقرأ الصفحة الفلانية عشان أشوف مرادك مني إيه؟ أشوف في كل آية مطلوب مني إيه يا رب؟ إنت أمَّا يكون ليك هدف هتوصل بسرعة أوي أوي.

سيدنا إبراهيم يا جماعة.. يعني في ناس وصلت لى سيدنا إبراهيم وصله في السرعة دي؟ سيدنا إبراهيم وصل في يوم في 24 ساعة، على آخر القصة كان عنده 24 ساعة لغاية ما وصل **"وَجَّهْتُ وَجْهِيَ لِلَّذِي فَطَرَ السَّمَاوَاتِ وَالْأَرْضَ"** الأنعام: 79 لغاية ما وصل لتوحيد الرجعة على الله، لغاية ما خلاص وصل.

في ناس وصلت لى سيدنا إبراهيم وصله في اليوم دا في سنبيين طويلة وموصلوش كمان لبييه؟ مسيش حاجة تعطله.. مسيش حاجة تقف في طريقه.. منشغلش بغير الطريق، عشان كدا ربنا يقولك **"فَلَمَّا جَنَّ عَلَيْهِ اللَّيْلُ رَأَى كَوْكَبًا"**، "فلما جَنَّ" يعني إيه "جَنَّ"؟ "جَنَّ" يعني لفة الظلام في كل ناحية، يعني ساب قومه ومشى بعيد خالص لغاية ماراح لمكان بعيد وظلام، والظلام لفة من كل ناحية، يعني إيه؟ بص يا حبيب قلبي:

إياك أن تُضَيِّعَ فتوح الله عليك، أوعى.

لما سيدنا إبراهيم ربنا وراله النور **"وَكَذَلِكَ نُرِي إِبْرَاهِيمَ مَلَكُوتَ السَّمَاوَاتِ وَالْأَرْضِ"** عمل إيه؟ مضيعش بقى.. إنت ممكن بعد رمضان تلاقي فجأة نور جه في قلبك، بدأت تحس إنك بتحب القرآن، بدأت إنك إنت تحس إن لالالاً أنا حياتي اللي فاتت دي لا يمكن تستمر كده، أنا حاسس بنور، أنا حاسس إن فعلاً لا يُمكن أستمر كده.. أنا حاسس إني بدأت أحب القيام أوي، أنا عايز أحفظ قرآن، أنا عايز أشغل في الدعوة، نور.. أنا قلبي لا يمكن أسيبه كدا، أنا إن شاء الله عايز أجتهد في التربية القلبية.

أهو دا نور ربنا ورهولك، لو إنت اتشغلت عن النور دا بحاجة، رجعت اتشغلت بدنيا ضيعت النور اللي ربنا ورهولك، لو إنت اتفرغت للنور دا هيفتح عليك بأضعاف مضاعفة من الأنوار بعده.

عشان كده سيدنا إبراهيم لما ربنا قال **"وَكَذَلِكَ نُرِي إِبْرَاهِيمَ مَلَكُوتَ السَّمَوَاتِ وَالْأَرْضِ"** ربنا وواله النور أهوه نور تعظيم الله، عمل إيه؟ **"جَنَّ عَلَيْهِ اللَّيْلُ"** اعتزل، ساب الدنيا، لم ينشغل بغير الطريق، اعتبر الوصول إلى الله قضية حياته الأولى، لم يُضَيِّع فتح الله عليه.. فلما اعتزل وبدأ يتدبر، ربنا إداله أنوار إيه يا جماعة؟

أنوار الله لسيدنا إبراهيم:

أول نور: **"لَا أَحِبُّ الْآفِلِينَ"** هنقله دلوقتي.

تاني نور: **"لَنْ لَمْ يَهْدِنِي رَبِّ لَأَكُونَنَّ مِنَ الْقَوْمِ الضَّالِّينَ"** كل دي أنوار رهيبة وفتوحات رهيبة.

تالت نور: **"يَا قَوْمِ إِنِّي بَرِيءٌ مِّمَّا تُشْرِكُونَ"**

رابع نور: **"وَجَهتُ وَجْهِي لِلَّذِي فَطَرَ السَّمَوَاتِ وَالْأَرْضِ"**

خامس نور: **"وَكَيْفَ أَخَافُ"**

سادس نور: **"فَأَيُّ الْفَرِيقَيْنِ أَحَقُّ بِالْأَمْنِ"**

سابع نور: **"وَتِلْكَ حُجَّتُنَا آتَيْنَاهَا إِبْرَاهِيمَ عَلَى قَوْمِهِ"**

ايبيه دا؟! لو إنت ربنا وراك نور حب القرآن مثلاً فبدأت تُجاهد وقلت لاااا أنا مش هضيع الفتح اللي ربنا سبحانه وتعالى فتحه على قلبي، وبدأت يبقى قضية حياتك الأولى في الفترة دي إنك إنت تُصلح قلبك بعد ما ربنا حسسك بالنور دا.

يا جماعة ممكن يكون واحد منكو دلوقتي قاعد حاسس إن فعلاً لألألاً أنا لازم أصلح قلبي أو أنا لازم أجتهد في الطاعة، وقيام الليل، أنا بدأت ألاقي له لذة، دا معناها إن ربنا دلوقتي وراك نور، لو إنت انشغلت عنه بدنيا.. تُضيعه، لو إنت خليته همك الأول.. هتوصل لأنوار أعظم مما تتخيل.

حالنا مع الوصول إلى الله

عشان كده إحنا كلنا واحد من أربعة يا إما:

1- واحد الوصول إلى الله مهوش قضية أصلاً من قضايا حياته.

2- واحد الوصول إلى الله قضية بس من ضمن القضايا.

3- واحد الوصول إلى الله قضية حياته الأولى.

4- واحد الوصول إلى الله قضية حياته الوحيدة الوحيدة الوحيدة في الحياة.

أي حاجة ملهاش قيمة في الحياة، يعني ساعات الواحد بيسمع كلمات من الإخوة بتبقى جميلة أوي، تلاقي الأخ يقولك أنا لو مثلاً بقيت مهندس، بس لا حفظت القرآن ولا عرفت ربنا ولا وصلت بقلبي إلى الله؛ أنا خسرت كل حاجة، ولو مبقتش مهندس بس وصلت لربنا وبقيت داعية إلى الله؛ أنا كسبت كل حاجة.

هو مش قصده يسيب، هو مفيش تعارض عشان تسيب، إنما هو قصده إن أفهم إيه الحاجة اللي ليها قيمة في حياتي؟

تدبر في ملكوت الله.. لتستشعر عظمته.

"وَكَذَلِكَ نُرِي إِبْرَاهِيمَ مَلَكُوتَ السَّمَاوَاتِ وَالْأَرْضِ" في أثر عن قتادة في تفسير الطبري "إن إبراهيم رُفِعَ إلى الأفلاك ورأى الكون كله وهو يبسبح في السماوات والأفلاك بتسبح، ثم نظر إلي أهل الأرض فرأى الضلال اللي على الأرض فشاف أد إيه الحق وعظمة الله في السماء وأد إيه ضلال الناس في الأرض".
وفي أثر ذكره الشيخ مصطفى في قصة يونس في تفسيره: "إن لما الحوت ابتلع سيدنا يونس عليه السلام طاف بيه في كل بحار الأرض، كل المحيطات بتاعت الأرض، فسيدنا يونس عليه السلام سمع تسايح الحيتان والسماك في قاع البحر فشاف أد إيه ملكوت الله العظيم في كل مكان في الوجود".

يا جماعة الواحد ساعات يقف قدام أي مخلوق كدا في ملكوت السماوات والأرض، إنت آخر مرة بصيت في السما إمتي؟؟ يا إخوانا هناك قلوب تربت على النظر للنساء وقلوب تربت على النظر للسما، إنت قلبك اتربي على إيه؟
إنت آخر مرة بصيت للسما إمتي؟ أعظم مخلوق ربنا حطه قدام عينك عشان توصله بيه إمتي؟ آخر مرة عشت مع جلال ملكوت الله في السما إمتي؟ يا جماعة عايزين نعيش مع ربنا "نُري إِبْرَاهِيمَ مَلَكُوتَ السَّمَاوَاتِ".

كنت خارج من الجمعية الشرعية في صلاة الفجر من أيام، ببص على شجرة كده جنب الجمعية قلت سبحانك يارب دا انتي كل حاجة فيكي بتسبح.. جذرك يبسبح، ودموعك بتسبح، وورقك يبسبح، والطيور اللي عليك بتسبح، بصيت لورقة الشجرة وهي مدلدة كدا من الفرع الصغير بتاعها قلت يا سلام يارب..
كل حيوان أو إنسان ربنا خلقه كان الأول في بطن أمه له حبل سري بيوصله كل حاجة منه عشان يفتكر هو فقير أد إيه، ومُعلَّق برحمة ربنا، اللي كان لو قطع عنه الحبل السري دا كان ضاع أد إيه..
وبيفضل أثر الحبل السري دا في جسم الإنسان عشان يفضل فاكر الحاجة اللي كان معلق بيها برحمة ربنا، ويفتكر إن لما اتقطع الحبل السري هو ما استغناش عن ربنا، إنت لسه فقير بس إنت موهوم إنك مستغني، موهوم إنك مُستقل بذاتك.

إنما ورقة الشجر لأ، ورقة الشجر بتفضل طول عمرها متعلقة في الفرع الصغير بتاعها، طول عمرها متعلقة في الحبل السري بتاعها.

في آية من آيات ربنا في المخلوق.. اللي يدل على الافتقار إلى الله سبحانه وتعالى، مخلوق حياته كلها افتقار، ما انقطعش أبداً؛ عشان كده ربنا اعتبر سقوط ورقة الشجر آية من الآيات اللي يبسبح عليها، سبحان الله العظيم يا جماعة "نُري إِبْرَاهِيمَ مَلَكُوتَ السَّمَاوَاتِ وَالْأَرْضِ" يا جماعة عايزين نفتح عيننا، عايزين نبص بقى، عايزين نتدبر "وَلْيَكُونَنَّ مِنَ الْمُوقِنِينَ" عايزين نوصل لليقين.

أفكر والله إنّ الواحد زمان يعني حتى في أول التزامه كان عادي يعني لو كان حد مثلاً قال إيه ده الشيعين بيقلوا شبهات عن وجود الله تعالى، الواحد كان يقول: "إيه؟ لا ياعم متسمعش أحسن إيه.. الشبهات تأثر فيك ولا حاجة" لغاية ما جيت مرة وأنا في سنة تالته قولت أنا أفصّي كذا يوم للتدبر في خلق الله، ربنا أعاني على نفسي ثلاث أيام بقيت أنزل بالنهار أروح الجنانين..

أقعد أبص في ورق الشجر، أبص في آيات ربنا، في الطبيعة، والله العظيم يا جماعة والله من يومها حتى لحظتها هذه ربنا يثبت قلوبنا على الإيمان، والله العظيم الواحد بقى يقول إيه الجنون اللي إحنا فيه ده؟! إيبيه ده؟! إحنا بندور على إيه؟!!

دا عظمة الله ووجود الله دي أعظم حقيقة في الدنيا كلها، دا ربنا الظاهر، الظاهر في كل شيء يا جماعة، أقل قدر من المجاهدة هيوصلكوا، متستخسروش المجاهدة في ربنا، لازم تجاهدوا، لن تصلوا إلا بالمجاهدة.

القاعدة الثانية: الفتح على قدر الهمة

هنتكلم عن القاعدة دي دلوقتي "فَلَمَّا جَنَّ عَلَيْهِ اللَّيْلُ" لما الليل لامسه من كل ناحية ده اللي قولنا عليه إيه بقى؟ اللي هو سيدنا إبراهيم جه له نور من الأنوار.. انقطع.. اعتبر إن الوصول قضية حياته الأولى.. منشغش بغير الطريق.. مفيش دنيا جت ضيعته وشغلته، "رَأَى كَوَكَبًا" خدوا بالكم من كلمة "رَأَى" المرة دي، اللي وراه ربنا المرة دي بيص فعشان كده وصل، قلنا دي قاعدة الفتح، على قدر الهمة، أو مال القاعدة اللي قبلها؟ الفتح على قدر حال قلبك مع الله.

القاعدة الثانية: الفتح على قدر الهمة.. يعني إيه الفتح على قدر الهمة؟ إنت شايل همّ إنك توصل أد إيه؟ سيدنا إبراهيم كان شايل همّ إنه يوصل وهو بيص للشمس والقمر، وصل لربنا المرة دي منهم، كان الواحد يعني سبحان الله العظيم الهمة دا يا جماعة سر العطاء، فمن كان همه هو الله كفاه الله هم كل شيء.

كان الواحد أيام الكلية يكتب الورقة دي كدا يجيب ورقة ويكتب عليها "من كان همه هو الله كفاه الله هم كل شيء" وتنزل وإنك راكب رايح الكلية تقف تبص في الورقة عشان تفتكر، أوعى.. أوعى تشيل هم حاجة غير الوصول لربنا، هيكيفيك هم كل حاجة، لما كان الواحد يلتفت عن ربنا سبحان الله تلاقي كل حاجة قفلت كأن ربنا بيقل سبحان الله لميين؟؟ رايح لفيين؟ ايه اللي أحسن مني؟ ايه اللي أحسن مني؟..

ما تلتفتش وأنا هحل لك كل مشاكل حياتك، وأسفلتلك طريقك، وأفتحكلك الأبواب، وأزل لك العقبات، خلي كل همك هو أنا، هو الوصول ليا وأنا هكيفيك كل همك، الهوموم بتاعة الدنيا اللي غيرك شايلها هزللهالك لوحدها بس إنت خلي همك هو ربنا سبحانه وتعالى.

الهم يا إخواناً يعني سيدنا موسى مثلاً عارفين المثال سيدنا موسى؟ شوفوا سيدنا موسى وصل لربنا في كام مرحلة هنتكلم عن النقطة دي دلوقتي يعني كل حاجة ليها مكان في الكلام عنها.

شوفوا ربنا يقول عن سيدنا إبراهيم إيه؟ أنا عايز أحسسك أد إيه هم سيدنا إبراهيم إنه يوصل؟ أد إيه كان سيدنا إبراهيم عايز يوصل؟ **"فَنظَرَ نَظْرَةً فِي النُّجُومِ"** الآية دي رهيبه، لما كنا جاين لسيدنا إبراهيم فبيص للنجوم كده ربنا يقول **"فَنظَرَ نَظْرَةً"** يعني بص تثبت عينه مقدرش يشيلها، بصّ في ملكوت الله في السماء، مهوش قاءدر، **عايز يوصل**، **عايز أوصلك ياارب**، منايا أوصلك يارب، لما يبشوف مشاهد جلال الله عايز يوصل ولكن أوصل إزاي؟ الألم النفسي الرهيب للي عايز يوصل ربنا لما يبجي يلاقي حاجة واقفة قدامه في الطريق أو مهوش عارف يوصل إزاي؟ فسيدنا إبراهيم بص **"فَنظَرَ نَظْرَةً"** نظرة واحدة، فضل مصوب نظره **"قال إني"** إيه؟؟ **"فَقَالَ إني سَقِيمٌ"** الصفات: 89.

أما بحثت في معنى كلمة سقيم في اللغة لقيت إن في شجرة في الشجر اسمها شجرة السوقم، شجرة السوقم جاية من نفس الجذر، يقولك الشجرة دي ثمارها زي الحجر زي الصخر، خضرة وزى الصخر، وبعد شوية الشجرة دي ثمارها بتلين خالص وتستوي وتبقى صفراء ويبقى طعمها جميل جدًا، وتبقى ريحتها طيبة خالص. سبحان الله فقلت سبحان الله.. يبقى خدوا بالكوا يا جماعة السقم ده اللي حصل في الشجرة إيه؟ إن الحجر استوى، إن الحجر لان.

عارفين أحد السلف يقول: **"إن سقيم يعني إني محموم يعني عندي حمى"** يبقى مش أي حمى بقى عارفين لما الواحد يجيله حرارة؟ يبقى كأن الحرارة في جسمه هتسوي جسمه زي النار ما بتسوي الأكل اللي بيتحط عليها. سقيم ده يعني قلبه موّع من جوه، سقيم ده يعني خلاص مش قادر من كتر الهم اللي جواه، مريض بس مش أي مرض، مرض شديد.

إنت مرة مرضت لأنك عايز توصل لربنا؟ أنت حسيت مرة إنك تعبان ونمت طريح الفراش لأنك حاسس إنك بتجاهد ومش عارف توصل؟ مرة من كتر هم ووصولك إلى الله حسبت إن رجلك معدتش قادرة تشيلك مرة؟ يا جماعة كام واحد فينا؟؟ محدش منكوا قبل كذا طلعلوا حبوب في وشه؟ ولا سخن؟ ولا لوزه إنتفخت؟ ولا نام في السرير كذا يوم من كتر إن هو مش عارف يوصل لربنا فنام في السرير خلاص معدتش قادر؟ محستش إنك مريض مرة؟ الهم موصلش بيك للدرجة دي؟ أنا عايز أقولكوا ربنا فتح على سيدنا إبراهيم إيه؟ لأن الهم دا كان كله في قلبه، لأنه كان شايل هم رهيب إنه يوصل لربنا، عشان كذا أنا بفرغ على دي قاعدة: إياك أن تقف عند حد في طموحك في الوصول إلى الله.

القاعدة الثالثة: إياك أن تقف عند حد في طموحك في الوصول إلى الله

أوعى تَقْنَع بحد في علاقتك مع الله، أوعى.. أوعى.. زي ما البخاري قال عن رسول الله صلى الله عليه وسلم حديث الرسول أول حديث في البخاري: **"إنما الأعمال بالنيات وإنما لكل امرئ ما نوى"** صحيح البخاري يعني إيه؟؟ يعني ربنا هيديك على قد نيتك، **"وإنما لكل امرئ ما نوى"** يعني إيه؟؟ يعني ربنا هيفتح عليك على أد همك، **"وإنما لكل امرئ ما نوى"** يعني إيه؟؟ يعني ربنا هيصطفيك على أد هدفك، **"وإنما لكل امرئ ما نوى"** يعني إيه؟؟

يعني الفتح على قَدْرَ الهم، على قَدْرَ النية، على قَدْرَ الصدق، على قَدْرَ الهدف.

قال **"فَلَمَّا جَنَّ عَلَيْهِ اللَّيْلُ رَأَى كَوْكَبًا"** فبص للكوكب كده قال **"هَذَا رَبِّي"** ده ينفع يبقى ربنا؟ ده ينفع يبقى هو اللي خلقني؟ ينفع يبقى هو اللي يرزقني؟ ينفع لما أترنق أروح أقف على بابه؟ ينفع أرفع أيدي له وأقوله ارزقني وأغثني وأجرتني وأن أحتاجه؟ طب ينفع دا يبقى هو ري؟

سيدنا إبراهيم كان عنده شوق رهيب للوصول إلى الله، أنا ماشي في تفسير الآيات على تفسير معاذ بن جبل وعلى تفسير الإمام الطبري وتفسير ابن عباس اللي اختاورا إن سيدنا إبراهيم عليه السلام كان بيتدبر في الكون يا جماعة **"فَلَمَّا جَنَّ عَلَيْهِ اللَّيْلُ رَأَى كَوْكَبًا قَالَ هَذَا رَبِّي"** دا ينفع دا؟ شوفوا الشوق بيدور على ربنا أد إيه! عاملين بالظبط والله المثل الأعلى زي واحد أبوه ملك عظيم وتاه عن أبوه وراح في صحراء بعيدة فكل حلم حياته إنه يرجع لأبوه تاني.. فيلاقي واحد معدّي بعربية كرو فيقوله وصلني الله يخليك للطريق دا.. يوصله، ينزل يلاقي موتوسكل يقوله لا وصلني الله يخليك للحتة دي.. يوصله، ينزل يلاقي عربية تطلعني على أول الطريق ماشي، ينزل يلاقي طائرة توصله، عمره ما هيسنقر لغاية ما يوصل لأبوه، قلبه مُعَلَّقٌ باللحظة اللي هيوصل فيها لأبوه من شدة تعظيمه له.

ولله المثل الأعلى سيدنا إبراهيم يا جماعة حسن بشوق جارف للوصول إلى الله **"قَالَ هَذَا رَبِّي فَلَمَّا أَفَلَ"** انطفى نوره **"قَالَ لَا أَحِبُّ الْآفِلِينَ"** الأنعام: 76 لالا لالا إزاااي؟؟ لو ري أفل عني بالنهار واحتجته بالنهار هروحله فين؟ ولو ري بيأفل بالليل وجاي حد يظلمني بالليل هروح فين؟ هقف على باب مين؟ خدوا بالكوا سيدنا إبراهيم يقول **"لَا أَحِبُّ"** يعني إيه لا أحب؟ سيدنا إبراهيم عارف إن أساس علاقته بمولاه هي علاقة الحب.

القاعدة الرابعة: بداية علاقتك مع الله هي حب الله

يا جماعة الحب يا إخواناً ودي قاعدة خطيرة جداً بداية علاقتك مع الله هي حب الله، لازم دي تبقى أول عاطفة في قلبك تجاه الله، زي السيدة مريم **"وَاذْكُرْ فِي الْكِتَابِ مَرْيَمَ إِذِ اتَّبَعَتْ مِنْ أَهْلِهَا مَكَانًا شَرْقِيًّا"**، **"انْتَبَذَتْ مِنْ أَهْلِهَا"** معدتش عايزة بشر.. معدتش عايزة صحبة حد.. **"انْتَبَذَتْ"** النبذ ده فيها حاجة زي ما واحد ينبد حاجة معدش عايزها **"إِذِ اتَّبَعَتْ مِنْ أَهْلِهَا مَكَانًا شَرْقِيًّا * فَاتَّخَذَتْ مِنْ دُونِهِمْ حِجَابًا فَأَرْسَلْنَا إِلَيْهَا رُوحَنَا فَتَمَثَّلَ لَهَا بَشَرًا سَوِيًّا"** مريم: 17:16..

مش عايزة حد يشوفني ولا أشوف حد.. أنا عايزة أبقى في خلوة دائمة معاك يا رب **"فَأَرْسَلْنَا إِلَيْهَا رُوحَنَا"** الفتح يقوم جاي على طول، ما دام وصلت في حب الله للدرجة دي الفتح يقوم جاي على طول.

زي سيدنا محمد.. حديث بدء الوحي لو تدبرتوا يا جماعة عليه الصلاة والسلام في حديث بدأ به من الوحي كان إيه؟ الرؤية الصادقة، ليه الرؤية؟ ربنا بيبعتلك رسايل، بيبعتلو رسايل، رؤية تتحقق تاني يوم، هو مين اللي جابله الرؤية دي؟ ربنا.. طب ربنا إدهالي أنا ليه؟ إشمعني أنا؟ ده أكيد بيحبني، يعني دي رسايل ربنا بيقولني إنه بيحبني.. طب ما أنا لازم أحبه، فيبدأ الحب يتحرك في قلب سيدنا محمد أكثر، فيبدأ يطلع للمرحلة اللي بعد كده..

يقوم يروح للخلوة بقى، الخلوة دي اللي هو بقى في أنس بينك وبين حبيبك.. معدتش بس مجرد إنك إنت بتحبه، ده بقى فيه أنس بمجرد إنك إنت لوحدهك معاه، بعد كده الحب بيزيد أكثر، يبقى الخلوة دي على الجبل في غار حراء، إشمعنى علي الجبل؟ لأن الجبل دا، قمة الجبل أقرب حاجة للسما لربنا، وأبعد حاجة عن الناس عن المخلوق، فهو عاوز يقرب من ربنا، فيطلع لأقرب حاجة في الدنيا يقرب بيها من السماء..

بعد كده الحب بيزيد أكثر لما الخلوة تزيد أكثر ولما عطاءات ربنا تزيد أكثر.. يقوم يخلو الليالي ذوات إيه؟ ذوات العدد، يبقى مش قادر يسيبه يعني وهو رايح رايح مشتاق، وبعد شهر راجع مهوش عايز يرجع، الليالي ذوات العدد، بعد كده الحب بيزيد أكثر، يقوم يرجع فيتزود لمثلها ويعود، يعني معدش قلبه مع ناس ولا دنيا ولا زوجة ولا ولد ولا تجارة ولا حاجة..

هو حبه بالله، خلاص عاد علاقته بالدنيا إنه ياخذ الزاد اللي هينطلق بيه إلى الله ويرجع، تخيلوا يا جماعة شايفين الحديث الرهيب اللي بيقولك أول علاقة سيدنا محمد بربنا كانت علاقة الحب، يا جماعة علاقة الحب.

ربنا بيقول "الرَّحْمَنُ عَلَى الْعَرْشِ اسْتَوَى" طه:5، ربنا بيقول "الرَّحْمَنُ عَلَى الْعَرْشِ اسْتَوَى"، طيب ليه الرحمن قبل على العرش؟ لأن "على العرش" هتجيب في قلبك خوف وجلال؛ فربنا يجيب الرحمن علشان الحب الأول حتى قبل التعظيم، لازم تحب ربنا.

ربنا قال لموسى "يَا مُوسَى * إِنِّي أَنَا رَبُّكَ" طه:12،11، وبعد كده في أول طه "إِنِّي أَنَا اللَّهُ" طه:14، في الأول "أَنَا رَبُّكَ" اعرفني بالربوبية والنعم الأول، حبي الأول، وبعد كده "إِنِّي أَنَا اللَّهُ"، اعرفني بالجلال والتعظيم، ولكن الأول الحب الأول الحب، البداية يا جماعة حب الله البداية.

علشان كده إبراهيم بيقول "لَا أُحِبُّ الْآفِلِينَ" يعني إيه؟ أنا ما أعبدش حد مبعهوش، أنا بحب ربي ومش ممكن طلما ده آفل مبعهوش ولازم ربي يكون بيني وبينه حب عظيم، يبقى البداية حب الله سبحانه وتعالى، بدأنا صح؟ ياترى يا شباب بدأنا صح؟ مين فينا بدأ صح؟

الثلاثة والصخرة.. لما اتقفلت عليهم الصخرة قالوا إيه؟ إنه لن ينجيكم مما أنتم فيه إلا الله؛ فتوجهوا إلى الله، بدؤوا صح، خدوا بالكم الحديث ده خطير جداً بدؤوا صح، طيب لما الصخرة اتفتحت حنة كملوها زق بقى ولا شافوا إيه سبب اللي فتحها أول مرة؟ وهو التوجه وكملوها توجه؟ كملوها توجه.

يبقى علشان توصل لربنا مش لازم بس تبدأ صح لازم تبدأ صح وكمان تكمل صح، فينا ناس بدأت صح بس مكملت صح؛ علشان كده انقطعت في الطريق، يبقى لازم تبدأ صح، شوف إيه البداية؟ ليه ربنا هداك؟ ليه ربنا دخلك؟ ليه ربنا فتحلك؟ يقيناً كان فيه خير في قلبك، يقيناً كان في حاجة في قلبك تجاه ربنا، يقيناً كان في مشاعر أول الالتزام تجاه ربنا خليته يثبتك، إنت في الوقت اللي ألف واحد غيرك دخل الجامع وخرج في الوقت اللي ألف واحدة

غيرك لبست النقاب وانتكست، يبقى يقيناً فيه حاجة كانت في قلبك، يبقى ربنا فتح عليك بسبب ده، يبقى شوف إمتي ربنا فتح عليك؟ إنت كنت وقتها صح ارجع بقى زي ما كنت.

القاعدة الخامسة: ارجع إلى ما كنت عليه عندما فُتح الباب لك

خدوا بالكم من القاعدة الخطيرة دي يا جماعة شوف لو حد منكم تاه وحب يرجع تاني مع ربنا شوف إمتي الباب إنفتح؟ إنت ساعتها كنت صح، لما الباب اتفتح لهم الثلاثة والصخرة لما توجهوا إلى الله فده اللي كان ربنا يحبه منهم ففتح لهم مرة بعد مرة، شوف إمتي الباب اتفتحلك؟ إنت كنت وقتها صح، ارجع زي ما كنت. يعني أنا لما بلاقي نفسي نمت، والموضوع اتلخبط عليا ومعدتش عارف أعمل إيه، وتكاليف الدين اتزحمت، وأحس إن أنا تعبان وحاسس أي هقع، أقوم واقف مع نفسي كده، أنا إمتي شفت علامات إني كنت صح؟ أيام لما الواحد بدأ يقوم الليل بعد الفترة الفلانية، لما بدأ يقوم الليل بقلبه مع ربنا، آه يبقى أول حاجة القيام، أرجع الخطوة دي، طيب والمرة الثانية؟ آه أيام لما الواحد بدأ درس السلاب وابتدى يجتهد على إيده غير الملتزمين، أيوه يبقى إذا الاجتهاد في إنقاذ الناس من النار دي حاجة ربنا بيحبها، والمرة الثالثة؟ آه لما عملت الموضوع الفلاني..

يبقى كل واحد منكم يعامل نفسه كده يا جماعة، إمتي شفت علامات من ربنا؟ إمتي شفت عطاءات؟ إمتي ربنا يسرك طريق الدين؟ إمتي شرح صدرك؟ إمتي ورآك رؤى عظيمة فيها بشريات وتوجيه؟ إنت وقتها كنت صح علشان كده بقى أنا عايز أقولكم حته خطيرة جداً، قال "فَلَمَّا جَنَّ عَلَيْهِ اللَّيْلُ رَأَى" الأنعام:76، إنت إمتي شفت؟ إمتي رأيت؟ إمتي ربنا ورآك؟

القاعدة السادسة: احترم الرسائل الربانية

خدوا بالكم من القاعدة الخطيرة دي احترموا الرسائل الربانية بناعتكم، احترموا البريد الخاص اللي الرسايل بتجيلكوا فيه، احترموا الإرشادات الخاصة اللي ربنا بيعتها لكم، يا جماعة خدوا بالكم من القاعدة دي خطيرة والله العظيم ربنا بيعت لنا رسايل في حالتين..

إمتي بنشوف علامات؟

إمتي بنشوف رؤى؟ إمتي بنشوف معاملات؟ إمتي بنشوف علامات؟ رسايل خاصة جاية في بريدنا الخاص؟ لما تعمل حاجة من اتنين:

1- لما تكون هتطلع مرحلة جديدة

يا إما تكون هتطلع مرحلة جديدة؛ فربنا يقوم مديك رسالة فورية على طول، إنت صح كَمَل، زي ما عمل مع الثلاثة والصخرة، أول لما توجهوا فتح لهم حته من الباب على طول، ليه؟ أبوة كده صح، أنتم صح، كملوا بقى، كملوا على التوجه ده، بقى ربنا أول لما بتحط رجلك على خطوة جديدة بيعتلك رسالة على طول، رؤية، واحد يجي يشوفلك رؤية، تيسيرات، هدايا، شرح حاجة جديدة، كرامة، حاجة جديدة ربنا يقولك بيها إنت صح.

2- لما تكون بتنزل وانت مش عارف

يا إما هتكون هتطلع مرحلة جديدة، يا إما تكون بتنزل وأنت مش عارف، هتنزل من المرحلة اللي إنت فيها طول ما إنت في نفس مرحلتك واقف، يعني جهدت مثلاً لغاية لما بدأت تحفظ قرآن وتستقر إيماناً شوية، بعد كده وقفت بقي خلتك كده، تسعة وتسعين في المية مش هتشوف أي حاجة ولا هتشوف أي علامات، ليه؟ لأنك رضيت بالوضع اللي إنت فيه، إنما الرسايل بتيجي لما تكون هتطلع أو هتنزل.

أنا أعرف إخوة كثير جداً للأسف يا جماعة بيجي يقول أنا شوفت رؤية، هو الأخ كان بقاله شهر مثلاً بدأ يتاجر، أنا شوفت رؤية إن أنا بغرق في النيل ورا المسجد بغرق، يا بني إنت بتغرق يا حبيبي دي رسالة ربنا بيقولك إنت بتضيع، إنت بدأت تُفْتَن، خد بالك إنت قلبك بدأ ينصرف عن الله.

للأسف تسعين في المية من الإخوة مبيستجيبش للرسايل، يا جماعة مبيستجيبش مبيستجيبش، أنتم عارفين إحنا معظمنا مبيشوفش رؤى ليه؟ عارفين ليه؟ هتستغربوا؛ لأنك لما شفت رؤى ما اهتमितش أصلاً إنك تسمع التوجيه اللي فيها، فرينا يوجهك ليه؟

يا جماعة دي الرؤى دي كان النبي صلى الله عليه وسلم كل يوم بعد الفجر بيفسر للصحابة رضي الله عنهم الرؤى بتاعتهم عليه الصلاة والسلام، يعني لما يجيلك رسالة راقب، لما تلاقي فجأة الدنيا قفلت وكل حاجة قفلت، وقفلت من جوه، وقفلت في الطاعة، وقفلت في الدنيا، وقفلت في الشغل، وقفلت في الدراسة، في رسالة لازم تقف وتشوف في إيه؟ فيه رسالة معناها إنك بتنزل معناها إن في حاجة بتعملها غلط.

طيب لما تلاقي فجأة باب جديد اتفتحلك، صاحب صالح فجأة اتفتحلك، يعني الواحد والله يفتكر يا جماعة لما كان يحاول أيام الكلية يجتهد شوية في الدين تلاقي ربنا يرزقك صحبة واحد متعرفش اتقابلت معاه إزاي! ولا اترتب اللقاء بينكم إزاي! وهو من محافظة وانت من محافظة تانية خالص، ربنا يفتحلك بسببه الطريق إليه، مالم تكن تتخيله ولا تتصوره يعرفك حاجات في معرفة الله والوصول إلى الله مكنتش تعرف عنها أي حاجة، إنت كل لما بتقدم خطوة مجاهدة ربنا يفتح عليك ويبعتلك رسالة ويبسرك طريقه.

يبقى إذا يا إخوانا إمتي ربنا بيبعتلكوا رسايل؟ لما تكون هتجاهد أهو علشان تبتدي تطلع، أو بتنزل وحصل فتنة في حياتك وانت مش واخذ بالك.

خدوا بالكم يا جماعة، خدوا بالكم، خدوا بالكم من القاعدة الخطيرة دي جداً، لما حد منكم يوصله رسالة، يقيناً معظمنا في حياته رسايل دلوقتي أو كلنا، يا رسايل بتقولك خد بالك إنت بتنزل، إنت بتتحدرد، إنت في منحدر، أو يا رسايل بتقولك اتشجع، إنت صح، إنت كده كويس، قوم كمل، قوم انطلق، احترموا توجيه ربنا.

"فَلَمَّا جَنَّ عَلَيْهِ اللَّيْلُ رَأَى كَوْكَبًا قَالَ هَذَا رَبِّي" ينفع ده يبقى ربي؟ "فَلَمَّا أَفَلَ قَالَ لَا أَحِبُّ الْآفِلِينَ" الأنعام:76 مينفعش ده يبقى ربي أبداً، "فَلَمَّا رَأَى الْقَمَرَ بَازِغًا" الأنعام:77 "فلما" "ف" الفورية، يا إبراهيم بقالك كام ساعة قدام

الكوكب؟ طيب روح نام.. لا، طيب كُلُّ.. لا، طيب ممكن زمانك عطشان.. لا، "ف" فورية "فَلَمَّا رَأَى الْقَمَرَ" فضل يتدبر لما خلص القمر والقمر غاب..

"فَلَمَّا رَأَى الشَّمْسَ" الأنعام:78، يا إبراهيم بقالك 12 ساعة طول الليل، طيب رَوْح وبكرة كَمَل.. لا، أنا مش هقف، أنا مش هسيب حاجة تعطلني، طب كُلُّ.. طب استرِيح، ولا دقيقة ولا دقيقة، أنا مش هستريح لغاية لما أوصل، أنا مش هدوق طعم الراحة إلا لما أوصل، اللي هو يا جماعة قاعدة علو الهمة في طلب الحق.

القاعدة السابعة: علو الهمة في طلب الحق

لازم يبقى عندك علو همة، سيدنا موسى لما ربنا قاله إنك هتقابل الخضر، هيتعلم على إيده "قَالَ لِفَتَاهُ آتِنَا غَدَاءَنَا" الكهف:62، بعد لما مشى بعد البحرين، يعني جُهد قاتل ومكلش عشان يوصل المكان، فلما وصل للمكان كان جاع، فلقى الحوت راح فقام عامل إيه؟ أنا هعطل نفسي علشان الحوت ولا عشان الأكل، قام راجع ووصل للخضر، الخضر خده ركبته السفينة وسفره من بلد لبلد، وبنى معاه جدار، وبعد كده استطعما أهل قرية، يعني كله من غير أكل، فأبوا أن يضيفوهم، فضل مع الخضر لحد لما فسرلوا كل اللي حصل وساب الخضر، كل ده قد إيه؟ لا أكل ولا شرب ولا راحة ولا نوم؟!

عُلُو الهمة في طلب الحق يا جماعة، إنك إنت تعلق حياتك بالوصول، إن يبقى عندك طموح رهيب إنك توصل لربنا، أنا بقولكم على قواعد والله العظيم اللي هيعيش مع أي حاجة منها هيشوف فتح ربنا في حياته عليه، اللي هيطبقها، اللي هيلزمها، أنا بحاول أفتحلك طريقك لربنا، أنا بحاول أخلي طريقك تبقى فاهم إيه المطلوب، أنا مزردش ليه؟ لأن الكلام ده مش في حياتك، طيب أزيد إزاي؟؟ ابدأ شوف هتوصل إزاي؟ طب أعمل إيه؟؟

قصص الأنبياء أهيه، السلسلة اللي بادئين فيها، يا جماعة **قصص الأنبياء مليانة كنوز مذهلة**، والله العظيم أنا أعرف ناس كان قوت قلوبهم وحياتهم قصص الأنبياء دي، إن هو يقرأ قصة إبراهيم عليه السلام يحس إنه خلاص يارب.

أنا أحد الإخوة قَالِي لما أتعرفت عليه: أنا قعدت خمس سنين من عمري عايش مع سيدنا إبراهيم، مفيش حد عايش معاه غير سيدنا إبراهيم، عايش معاه في حركاته وسكناته وكلامه وقلبه وعبادته، أنا عايش وبحاول أتقمص شخصيته، يعني تخيلوا يا جماعة لما واحد يعيش مع الكنوز دي للدرجة دي، إحنا مضيعين.

للأسف في التروايح آيات الآخرة الإخوة تعيط، طب آيات عظمة الناس تتاوب، طب آيات قصص الأنبياء تنام، ده جهل، جهل شنيع، ده والعياذ بالله طمس على البصيرة، قصص الأوائل في البشرية تنام فيها! إنت مش عارف أصلاً إيه اللي بيتقال قدامك، إنت مش حاسس إيه اللي بيحصل حواليك.

"فَلَمَّا رَأَى الْقَمَرَ بَارِغًا قَالَ هَذَا رَبِّي" ينفع ده يبقى ربنا؟ شوق رهيب "فَلَمَّا أَفَلَ قَالَ لَئِن لَّمْ يَهْدِنِي رَبِّي لَأَكُونَنَّ مِنَ الْقَوْمِ الضَّالِّينَ" الأنعام:77، أبوة بقي لازم وقفة، كل خطوة مجاهدة كان سيدنا إبراهيم بيقدمها لربنا كان ربنا بيعتله نور

معاه على طول، يعني لما جاهد في التدبر في الكوكب ربنا اداه نور، إيه؟ هااا حد صاحي معايا بقى **"لا أَحِبُّ الْآفِلِينَ"** نور خروج المخلوق من القلب.

أنا خلاص أصل البنت الجميلة هتعجز، والشاب الجميل هيمرض، والبيت الجديد هيقدم، والعربية الجديدة هتتكسر، الدنيا كلها آفة، فلما سيدنا إبراهيم يقول **"لا أَحِبُّ الْآفِلِينَ"** يعني المخلوق خرج من قلبه.

فلما تدبر في الكوكب ربنا إداله أول نور: نور خروج المخلوق، لما تدبر في القمر ربنا إداله ثاني نور: **"لَنْ لَمْ يَهْدِنِي رَبِّي لَأَكُونَنَّ مِنَ الْقَوْمِ الضَّالِّينَ"** نور أنا هضيع من غيرك يارب هضيع لو مأنقذتنيش يارب، نور دخول تعلق القلب بالله، نور الافتقار إلى الله..

طب لما كمل وتدبر في الشمس ربنا إداله نور **"وَجَّهْتُ وَجْهِيَ لِلَّذِي فَطَرَ السَّمَاوَاتِ"** الأنعام: 79 نور توحيد الوجهة على الله، نور الوصول إلى الله، يبقى كل خطوة ربنا إداله نور معاه، ليه؟ خد بالك القاعدة الخطيرة دي: الفتح على قَدْر المجاهدة.

القاعدة الثامنة: الفتح على قَدْر المجاهدة

قاعدة من أخطر ما يكون، سيدنا إبراهيم يا جماعة مع كل خطوة ربنا بديه نور، يبقى إنت كل خطوة هتجاهد فيها ربنا هيدريك نور تلتزم، ربنا يديك نور تقوم تحفظ قرآن، يبجي نور ثاني تقوم تبدأ تشتغل في الدعوة، نور ثالث تقوم تبدأ تطلب فقه وعقيدة، نور رابع تقوم تفتح دروس المشايخ تاخذ نور، كل ما بتاخذ خطوة جديدة تاخذ نور، طيب لو وقفت؟ يقف، ليه كل نور مع خطوته؟ **علشان ساعة لما هقف يقف**، طيب ليه ربنا بيديك مع كل خطوة نور؟ ليه؟ **علشان يشجعك**، علشان لما تلاقي قلبك زاد وإيمانك زاد وعلامات المعاملة زادت؛ تقوم تشجع وتعرف إنك صح.

يعني إيه يا إخوانًا؟ يعني يا جماعة سيدنا إبراهيم كل لما كان يجاهد كل لما ربنا يفتح عليه، الكلمة اللي ربنا قالها في الحديث القدسي الخطيرة **"وإن تقرب مني شبرًا تقربت إليه ذراعًا"** ده مقام ثاني ده، واحد جاهد مجاهدة أعلى وفيه **"وإن أتاني يمشي أتيته هرولة"** صحيح مسلم، يبقى أنت يا أبو شبر، يا أبو ذراع، يا أبو مشي، إنت واحد من الثلاثة يا أبو شبر اللي جه قدم خطوة مجاهدة واحدة وبعد كده وقف ربنا إداله على قدر مجاهدته..

وفيه واحد قدم ذراع قعد كذا شهر مجتهد في الدين بس أول لما الدراسة جت أو الامتحانات جت قام واقع، ولا أول لما اتخرج من الكلية قام سايب، يبقى ده إيه؟ خد برضوا على قدر مجاهدته..

أومال إيه **"وإن أتاني يمشي"**؟ اللي موقوفش بقى، اللي مش قدم شبر ووقف أو قدم ذراع ووقف، فضل ماشي، فضل مفيش حاجة تعطله عني، ده بقى اللي ربنا يأتيه هرولة، سبحانه وتعالى.

يبقى على قدر لما تقدم على قدر لما تاخذ، على قدر لما تجاهد على قدر لما يتفتح عليك، الطريق طويل يا جماعة، سيدنا موسى لما رأى النار لما راح شاف النار لما راح عند النار علشان يشوف القبس اللي فيها، وبعد كده لقي العصاية وقعت بقى تعبان **"وَلِي مُدْبِرًا وَلَمْ يُعَقِّبْ"** طلع يجري طلع يجري مبسش وراه، طلع يجري من الخوف، طيب ربنا سبحانه وتعالى **"يَا مُوسَى أَقْبِلْ وَلَا تَخَفْ"** القصص: 31، فبعد كده ربنا سبحانه وتعالى يعمل إيه بقى؟ يوريله السحرة لما يلقوا العصي بتاعتهم، يقوم سيدنا موسى يبص..

لا بعد كده ربنا يقوله "أَذْهَبْ إِلَى فِرْعَوْنَ" النزاعات:17، يقول "قَالَ رَبِّ إِنِّي أَخَافُ" الشعراء:12، ميطلعش يجري مش زي موقف العصاية ميطلعش يجري، ولكن قال باللسان ري بي أخاف "لَا تَخَافَا إِنِّي مَعَكُمْ أَسْمَعُ وَأَرَى" طه:46.. بعد كده يقف في وش السحرة يرموا العصى بتاعتهم "يُجِبُّ إِلَيْهِ مِنْ سِحْرِهِمْ أَنَّهَا تَسْعَى" طه:66، يحصل إيه؟ أوجس في نفسه خيفة، ميطلعش يجري ولا قال ري بي أخاف، ده مجرد واجس في النفس بس، وبعد كده "قُلْنَا لَا تَخَفْ إِنَّكَ أَنْتَ الْأَعْلَى" طه:68، لما شاف البحر قدامه وفرعون وراه قال إيه؟ "كَلَّا إِنَّ مَعِيَ رَبِّي" الشعراء:62، معدش فيه خوف.

يبقى التربية القلبية دي مراحل، الناس بتطلع درجات، يا إخوانًا لازم تفضل تجاهد علشان توصل، أنت في ناس فينا وقفت عند "وَلَىٰ مُدْبِرًا" وناس وقفت عند "رَبِّ إِنِّي أَخَافُ" وناس وقفت عند "أَوْجَسَ خِيفَةً" وناس فضلت لغاية لما وصلت لمقام "كَلَّا إِنَّ مَعِيَ رَبِّي سَيَهْدِينِ" أنا عايز أقولك إن الطريق طويل لازم تجاهد. أعرف أحد الإخوة كان يعني التزم ودعا أخ للالتزام والتزم على إيده، فجه قالي أنا شفت رؤيا لما قالي أنا عرفت ده هيجصله إيه وده هيجصله إيه، ده كان الحمد لله كان وقتها طبعًا ودي حاجة خطيرة في تأويل الرؤى، مش معنى إنك شوفت رؤية إنك مثلاً وحش أو هتنزل إنك هتفضل طول عمرك كده، ده دي دلوقتي، إنما بي فوق الأخ بعدها بفضل الله ويطلع تاني، إنما وقتها اللي حصل قالي أنا شفت رؤية..

إن أنا في جبل وعليه سلم بيطلع عليه وقام فلان اللي التزم جديد قام جاي قام طلع السلم، طلع طلع لغاية لما وصل إلى قمة الجبل، أنا قمت جاي وراه طلعت خطوة اتنين تلاتة أربعة خمسة وتعبت قمت نازل، قلت سبحان الله ده هيدخل طلقة وهيطلع طلقة لغاية لما يوصل، والثاني هيوصل شوية كده وهيتعب وفعلاً هو ده اللي حصل، سبحان الله بس الحمد لله ربنا فضله واسع على الجميع سبحانه.

المقصود يا جماعة متقفش متخليش حاجة تتعبك متخليش حاجة توقفك الفتح على قدر المجاهدة، سيدنا إبراهيم يا إخوانًا يقول "رَبِّ أَرِنِي كَيْفَ تُحْيِي الْمَوْتَىٰ" ربنا قال "فَخَذَ أَرْبَعَةً مِنَ الطَّيْرِ فَصَرَّهُنَّ إِلَيْكَ ثُمَّ اجْعَلْ عَلَىٰ كُلِّ جَبَلٍ مِّنْهُنَّ جُزْءًا" البقرة:260، شوفلك عشرين جبل يا إبراهيم، وقطع أربع طيور حنت، وحط كل حنة على رأس جبل، دي مهمة ممكن تاخذ خمس أيام في تنفيذها، من طلوع الروح في طلوع الجبل، هو الجبل ده حاجة سهلة؟ هو إنك تطلع جبل لقمته وتنزل تمشي كذا كيلو جبل تاني لقمته وبعد كده تنزل تمشي كذا كيلو جبل، طب ليه ربنا طلب من سيدنا إبراهيم الطلب الرهيب ده؟ علشان ربنا يقولك مش هتوصل إلا لما تتعب، مش هتوصل بالراحة لازم تتعب، لازم تجاهد.

الآية اللي قبلها في سورة البقرة "أَوْ كَالَّذِي مَرَّ عَلَىٰ قَرْيَةٍ وَهِيَ خَاوِيَةٌ عَلَىٰ عُرُوشِهَا قَالَ أَنَّىٰ يُحْيِي هَذِهِ اللَّهُ بَعْدَ مَوْتِهَا فَأَمَاتَهُ اللَّهُ مِئَةَ عَامٍ ثُمَّ بَعَثَهُ" لما مات مائة عام وصحي وشاف الآية اللي ربنا عماه فيها قال "أَعْلَمُ أَنَّ اللَّهَ عَلَىٰ كُلِّ شَيْءٍ

قَدِيرٌ البقرة: 259 يعني إيه؟ يعني دفع مائة سنة من عمره علشان يوصل لليقين ده، دفع مائة سنة من عمره، إنت دفعت أد إيه؟ مستعد تتعب أد إيه؟ أد إيه يا إخوانًا؟

رسول الله قال: **"إنه ليغان على قلبي.."** يغان ده يعني شوية كده جم على القلب، طيب بتعمل إيه يا رسول الله صلى الله عليه وسلم؟ فوراً **"..وإني لأستغفر الله في اليوم مائة مرة"** صحيح مسلم، ليه؟ علشان المرض الصغير هيكب وهيتطور لازم وقفة، المرض الصغير لو سبته بعد كده هيكون حائل بينك وبين الله، حجاب بينك وبين الله، مدخل للشيطان إليك، فمن أولها لازم تجاهد.

يعني أنا عايز أقولكم إيه يا جماعة؟ أنا عايز أقولكم يا إخوانًا إنه لازم توطنوا نفسكم على المجاهدة.

هتوصلوا إمتي لمقام **"تَمَنَّوْنَ الْمَوْتَ"** آل عمران: 143 هتوصلوا إمتي لمقام **"إِنَّ يَعْلمَ اللهُ فِي قُلُوبِكُمْ خَيْرًا"** الأنفال: 70 هتوصلوا إمتي لمقام **"إِنِّي مُهَاجِرٌ إِلَى رَبِّي"** العنكبوت: 26 هتوصلوا إمتي لمقام **"فَنظَرَ نَظْرَةً فِي النُّجُومِ * فَقَالَ إِنِّي سَقِيمٌ"** الصافات: 88:89 هتوصلوا إمتي لمقام **"وَكَذَلِكَ نُرِي إِبْرَاهِيمَ مَلَكُوتَ السَّمَوَاتِ وَالْأَرْضِ وَلِيَكُونًا مِنَ الْمُوقِنِينَ"** الأنعام: 75 هتوصلوا إمتي لمقام **"وَجَهَّتْ وَجْهِي"** الأنعام: 79 هتوصلوا إمتي لمقام **"فَأَيُّ الْفَرِيقَيْنِ أَحَقُّ بِالْأَمْنِ"** الأنعام: 81 هتوصلوا إمتي لمقام **"وكيف أخاف"** هتوصلوا إمتي لمقام **"أولئك الذين هداهم الله"** هتوصلوا إمتي ياخوانًا؟

مش لازم نستمر نجاهد، أنا عايز أسألكم سؤال: ليه ربنا وعد اللي وقع في الزنا والشرك والكبائر إنه هيبدل سيئاته حسنات؟ ليه؟ في حين الكلام ده مجاش مع اللي وقع في الصغائر، عارفين ليه؟ لأن اللي وقع في الكبائر ده واحد وقع في بركة طين **علشان يطلع لازم يجاهد**، هو اللي غرقان في شرب ميه زي اللي غرقان في قاع بحر، اللي شوية معاصي صغيرة ده شرب مية، إنما اللي زنا مائة مرة ده علشان يسبب الزنا ده بيطلع روحه، اللي شرب مخدرات علشان يسبب المخدرات ده بيموت في المجاهدة علشان يسيبها، فلان جاهد طب هبدلك سيئاتك حسنات بقى، ليه؟ علشان **المجاهدة** علشان المجاهدة، يبقى لازم نجاهد يبقى الفتح على قدر إيه؟ على قدر المجاهدة.

القاعدة التاسعة: الفتح على قدر الافتقار

ناخد القاعدة الخطيرة **"لَنْ لَمْ يَهْدِنِي رَبِّي لَأَكُونَنَّ مِنَ الْقَوْمِ الضَّالِّينَ"** الفتح على قدر الافتقار، مهو بيقول يارب لو مهدتنيش أنا هضيع، يارب لو مهدتنيش مش هوصل، يارب أنا خلاص **"لَيْسَ لَهَا مِنْ دُونِ اللَّهِ كَاشِفَةٌ"** النجم: 58 يارب انقطع بي السير ومليش غيرك، تعرف تقول لربنا كده؟ تعرف في قيام الليل تقول كده؟

أحد الإخوة بيقولي أنا قولت لربنا يارب أنا غي مبفهمش، متعاملنيش إني بفهم، يارب عاملني واكرمني أنا مبهمش حاجة يارب، افتقار، افتقار يا إخوانًا، مفتقر إلى الله، سيدنا موسى لما قال **"رَبِّ إِنِّي لِمَا أَنْزَلْتَ إِلَيَّ مِنْ خَيْرٍ فَقِيرٌ"** * **فَجَاءَتْهُ إِحْدَاهُمَا تَمْسِي عَلَى اسْتِحْيَاءٍ"** القصص 24:25 افتتح عليه في دينته وفرج كربه أول ما كلمة الفقر جت، سيدنا إبراهيم أول ما قال **"لَنْ لَمْ يَهْدِنِي رَبِّي لَأَكُونَنَّ مِنَ الْقَوْمِ الضَّالِّينَ"** النور اللي بعدها على طول **"وَجَهَّتْ وَجْهِي"** ربنا فتح عليه خلاص بمعرفة الطريق.

دعاء؟ يعني إيه إن إنت تقعد تطوف سبع أشواط تقعد تقول يارب؟ كلمة يارب دي مفاتيح فتوح الله في حياتك، يا إخوانًا عايزين..

الرسول صلى الله عليه وسلم كان كل طلعة نهار وكل دخلة ليل يقول "اللهم إني أسألك خير هذا اليوم فتحه" افتح فتح جديد على أيدي النهاردة يارب، "ونصره" اقبل باب جديد من أبواب الباطل على أيدي النهاردة يارب، "ونوره" زود إيماني ونور الإيمان في قلبي النهاردة يارب، "وبركته" زود عملي واملائي يومي بركة في طاعتك يارب، "وهدهاه" زود علمي ومعرفتي بمرادك النهاردة يارب.

يا جماعة تعرفوا تقولوا كده؟ تعرفوا تقولوا الأدعية اللي بتستمطر رحمت وعطاءات الله دي؟ يا جماعة عايزين نعرف كنوز الدعاء، أنا عايزك تجيب الدعاء ألف دعوة ودعوة، أو تجيب الدعاء المستجاب، وتقعد تدعي لربنا يا بني، وتوقن إن كل كلمة حتى لو مش فهمها كنز ومفتاح من فتوح الله، يا جماعة عايزين ندعي؛ لأن الفتح على قدر الافتقار، على قد ما هتقول كلمة يارب "فَلَمَّا رَأَى الشَّمْسُ بِازِعَةً قَالَتْ هَذَا رَبِّي هَذَا أَكْبَرُ" كلمة "هَذَا أَكْبَرُ" دي ساعات والله الواحد لما يقعد يسمعها يقعد يبكي..

يا جماعة بحس بالألم النفسي اللي كان جوه سيدنا إبراهيم عليه السلام، إنتوا عارفين زي واحد مثلاً -مع فارق التشبيه جدًا بس ده اللي في ذهني يعني- واحد مثلاً في بحر وخايف يغرق ف وهو بيتعلق بحاجة فلقى إيه؟ فلقى حتة قشاية فجه يمस्क فيها لقاها بينزل مش نافعة رماها، ده الكوكب، بعد كده لقى حتة إيه؟ حتة غطا، أي حاجة ولا أي بتاع فجه يمस्क فيها لقاها منزلاه فرماها، ده القمر، مش نافع برضو..

بعد كده لقى حتة خشبة فهو عايز هو عارف خلاص أنه ولا دي ولا دي ولا دي، هو عارف إنه مفيش حاجة من دول خالص خالص بس يعني بيدي لنفسه دافع إنه يحاول فيقول إيه؟ الخشبة دي، ده دي أكبر من اللي فاتت يمكن، وعارف أصلاً خلاص هو وصل خلاص خلاص "قَالَ هَذَا رَبِّي هَذَا أَكْبَرُ" يعني أصبر الـ12 ساعة دول "فَلَمَّا أَفَلَّتْ" أقل كل عارض ما بين قلب إبراهيم عليه السلام وبين الله، "فَلَمَّا أَفَلَّتْ" فلما أقل نورها كان نور اليقين قد تفجر كاملاً في قلب إبراهيم عليه السلام "فَلَمَّا أَفَلَّتْ قَالَتْ يَا قَوْمِ إِنِّي بَرِيءٌ مِّمَّا تُشْرِكُونَ" الأنعام: 78 يا طب إيه اللي خلاه هنا يقول "يا قَوْمِ"؟ من عرف الله لم يسكت، اللي يعرف ربنا معدش يعرف يقفل بقة خلاص.

إنتوا عارفين لما جيت أدور أكثر سورة في القرآن جه فيها قل قل قل قل لقيتها سورة الأنعام اللي إحنا فيها دي لأنها بتتكلم عن ربنا، مادام عرفت ربنا معدتش تعرف تسكت، علشان كده سورة الإخلاص قل "قُلْ هُوَ اللَّهُ" الإخلاص: 1 مادام عرفته معدتش تقدر تسكت، علشان كده سورة الملك اللي بتتكلم عن الملك، وجنود الملك، وملائكة الملك، والسبع سماوات الطباق، وإنّ الكون إزاي ربنا مهيمن عليه، آخرها قل "قُلْ هُوَ الَّذِي أَنْشَأَكُمْ وَجَعَلَ لَكُمُ السَّمْعَ

وَالْأَبْصَارَ وَالْأَفْئِدَةَ قَلِيلًا مَّا تَشْكُرُونَ * قُلْ هُوَ الَّذِي ذَرَأَكُمْ فِي الْأَرْضِ وَإِلَيْهِ تُحْشَرُونَ" الملك: 23:24

"قُلْ أَرَأَيْتُمْ إِنْ أَهْلَكْنِي اللَّهُ وَمَنْ مَعِيَ أَوْ رَحِمَنَا فَمَنْ يُجِيرُ الْكَافِرِينَ مِنْ عَذَابِ أَلِيمٍ * قُلْ هُوَ الرَّحْمَنُ آمَنَّا بِهِ وَعَلَيْهِ تَوَكَّلْنَا فَسَتَعْلَمُونَ مَنْ هُوَ فِي ضَلَالٍ مُّبِينٍ * قُلْ أَرَأَيْتُمْ إِنْ أَصْبَحَ مَاؤُكُمْ غَوْرًا فَمَنْ يَأْتِيكُمْ بِمَاءٍ مَّعِينٍ" الملك: 28:30

إيه الطلقات اللي "قل" دي؟ خلاص كأن ربنا بيقولك أن اللي هيدخل في قلبه الكلام بتاع سورة الملك حياته كلها هتبقى كلام عن الله معدش يقدر يسكت معدش يقدر خلاص..

"قَالَ يَا قَوْمِ" معدش يقدر يسكت، معدش يقدر يكتفم اللي في قلبه "إِنِّي بَرِيءٌ مِّمَّا تُشْرِكُونَ* إِنِّي وَجْهْتُ وَجْهِيَ" إيه اللي وصل سيدنا إبراهيم عليه السلام بسرعة يا جماعة؟ إنه مسبش حاجة تعطله إنه مسمحش إن حاجه تعطله، خلاص "إِنِّي وَجْهْتُ وَجْهِيَ لِلَّذِي فَطَرَ السَّمَاوَاتِ" فطر الكون ده كله على التسبيح، إنتوا بتعملوا إيه؟ قمر إيه اللي بتعبدوه؟! وشمس إيه؟! وكوكب إيه؟! ده كل دي عبيد بتسبح ويتطوف في أفلاكها بتسبحه.

سيدنا إبراهيم عليه السلام فتح على قلبه بالعلم ده إزاي "لِلَّذِي فَطَرَ السَّمَاوَاتِ وَالْأَرْضَ حَنِيفًا" حنيفًا يعني مائلًا، ما هو الصراط المستقيم مستقيم، وفي طرق مائلة خارجة منه، فلما إنت تميل عن الطريق المائل تبقى إنت على الطريق الإيه؟ المستقيم..

حنيفًا أي مائلًا عن الطرق المائلة.. مائلًا عن طرق أهل الباطل، خلاص أنا وجهت وجهي ودي قاعدة توحيد الوجهة على الله.

القاعدة الحادية عشر: توحيد الوجهة على الله

إنك توحيد وجهتك، للأسف يا جماعة إن الجملة دي اللي مش هتتحقق في حياته عمره ما هيوصل لأي حاجة، عارفين اللي مش موحد وجهته ده عامل زي إيه؟ زي اللي راكب عربية وقاعد يجيب الجادون يمين شوية وشمال شوية، ويقوم مقابله حوده جانبية يقوم محود منها شوية، ويقابله صانية يقوم لافف فيها شوية، مش هيوصل لو مظبطش الجادون على وجهة واحدة وداس بنزين وانطلق، مش هيوصل..

"وَجْهْتُ وَجْهِيَ" خلاص يارب أنا عرفت وجهتي، أنا بقى ليا هدف في الحياة، يارب أنا بقى ليا وجهة، أنا يارب بقى ليا جهة بتجه إليها، أنا عرفت قبلي في الحياة، أنا خلاص يارب وحدت وجهتي عليك، عدت بعد كده مش هعمل أي حاجة في الحياة غير الحاجة اللي هتوصلني ليك، عدت يارب..

هحاول أوصلك بكل أي طريق يارب.. هوصلك بالعبادة، وبالذعوة، وبالجهاد، وبالعلم، وبكل حاجة يارب، بكل حاجة.

لا بد من التمحيص؛ فاثبت وكن على يقين بربك

"وَجْهْتُ وَجْهِيَ لِلَّذِي فَطَرَ السَّمَاوَاتِ وَالْأَرْضَ حَنِيفًا وَمَا أَنَا مِنَ الْمُشْرِكِينَ" وها "وَحَاجَّةُ قَوْمُهُ" لا بد من التمحيص فانتبه، لازم، أوعى تفتكر إنك هتمشي والسكة كده إيه لازم أي طريق لازم فيه مطبات، لازم علشان يختبر صدقك عشان كده أكبر بطولة في الأنبياء إنهم ما اتمزوش، مفيش حاجة هرتهم، يعني إيه ما اتمزوش؟ يعني سيدنا إبراهيم عليه السلام، ها، "أَأَنْتَ فَعَلْتَ هَذَا" الأنبياء:62 هاتوه، اسمه جه خلاص في التحقيق.. ما اتمزوش، إنت اللي عملت كدا؟

آه أنا اللي عملت كده **"أَفِ لَكُمْ وَلَمَّا تَعْبُدُونَ"** الأنبياء:67، **"حَرْقُوهُ"** اتحكم عليه بالإعدام، ما اتهزّش، أسجنوه عما تنولوه البنيان اللي فيه النار.. متهزّش..

وروه النار.. متهزّش، حطوه في المنجنيق.. متهزّش، احدفوه في الهوا.. متهزّش، ارموه في النار، دخل.. متهزّش، منسوب اليقين في قلب سيدنا إبراهيم عليه السلام متهزّش، حتى وهو في الهوا بيلامس النار.

إنّ الناس دي متهزّتش يا جماعة، يا جماعة كلمة عقيدة أنا قولتلکم دلوقتي إنّ لازم كل واحد يطلب فقه وعقيدة بس كتاب العقيدة اللي هيدرسلك ده مش العقيدة ده السور اللي بيحمي عقيدتك من أي شُبّهة جاية من الفرق الضالة إنّا يا جماعة العقيدة هي اللي كانت في قلب إبراهيم عليه السلام وهو بيترمي في النار، العقيدة هي اللي كانت في قلب يونس وهو في بطن الحوت، العقيدة هي اللي كانت في قلب رسول الله وهو في الغار والمشرّكين فوقه لو واحد منهم بصّ تحت رجليه لرآه، هي دي العقيدة هي دي الحاجات اللي إحنا عايزينها تبقى في قلوبنا..

الأنبياء ما اتهزّوش يا جماعة، كنت بقرأ في قصة سيدنا يوسف ويعقوب عليهما السلام في سورة يوسف فلما اتاخذ سيدنا يوسف من سيدنا يعقوب بيقول إيه **"فَصَبْرٌ جَمِيلٌ وَاللَّهُ الْمُسْتَعَانُ"** يوسف:18 قلت يا ااه دي قدر عليها إزااااي؟! ده قدر إزاي على المقام ده؟! آخر السورة لما اتاخذ منه بنيامين لقيته بيقول إيه **"فَصَبْرٌ جَمِيلٌ"** فصبر جميل إيه؟! **35 سنة ابتلاء يا يعقوب ولسه جبل اليقين في قلبك متهزّش؟! 35 سنة مسارق الابتلاء قاعدة بتهوى على قلبك يا يعقوب يا ابن إسحاق يا ابن إبراهيم ولسه متهزّش ولا اتزلزل؟! إيه اليقين ده؟! إيه الجبال اللي كانت في قلوبهم دي؟!!**

إيه يا إخواناً؟! إيه يا إخواناً الثبات اللي كانت الناس دي فيه؟! الرسول عليه الصلاة والسلام في الغار ويبص لفوق يلاقي المشرّكين لو واحد بص تحت ويقول اسكت أبا بكر **"ما ظنك باثنين الله ثالثهما"** صحيح البخاري، مايبتهزّوش يا جماعة، مايبتهزّوش، مفيش حاجة بتهزّهم، مفيش حاجة بتأثر فيهم خالص.

سيدنا يوسف عليه السلام في السجن وبقالوا سنين والمملك بيعتله يقوله ارجع إلى ربك مايبتهزّوش، مايبتهزّوش، مايبصش يلاقي الفتن في الشارع يقوم دماغه تحود عن طريقه، مايقبلوش عقد عمل ولا حاجة ولا.. لأ، هو ماشي في طريقه الدنيا ماشية خلاص ولكن لا تعطله أبداً، حتى في الامتحانات مايبتهزّش، حتى في فترة كُتّب كتابها والتجهيز للدخلة مايبتهزّش، حتى لما بتحمل وبتيجي تُنجب مايبتهزّش، مايبتهزّوش يا جماعة ثابتين، ثابتين ماسكين السرعة ووازنين سرعتهم على الطريق أظبط ما يكون، فتقدر تبقى كده؟

"وَحَاجَةٌ قَوْمُهُ" حاجه.. ما اتهزّش خدوا بالكم وقف في وشهم **"حَاجَةٌ"** دي لازم تعرّفك إيه؟ أن انتبه لابد أن تُمحصّ هتُمحصّ هتُمحصّ، هتُختَبَر هتُختَبَر، وهيتشال، هتتعطل ولا لأ؟ عوارض الدنيا هتتعطّلك ولا لأ؟ النهر اللي هيجي في الطريق هيعطّلك ولا لأ؟ خدوا بالكوا يا جماعة دي حاجة بردوا عايز أقولها لكم وإن كان ممكن نبرد الكلام فيها بعد كده..

إِنَّ الْمُؤْمِنَ خُلِقَ مَفْتَنَ تَوَابٍ، لازم هتفتن، لازم تعثر، نَسِيًّا إِذَا ذُكِرَ ذَكَرٌ، لازم هتنسى وتغفل، 50% من الإخوة اللي بتلتزم يقولك أصل أنا عملت الذنب الفلاني ورجعت أعمله، أصل أنا وقعتي ما أنت يا ابني لازم تقع، يا بني ده أنت ربنا خلقك كدا، دا دي من تربية ربنا لينا، **يا جماعة لو وقعتوا مأجَبَطُوش، قوموا وكمَلُوا، لو اتعطلتوا مأجَبَطُوش،** يا جماعة دا موضوع خطير جدًا..

أخ انتكس وبعد ما كان مجتهد في الدعوة عمل سكسوكة وبقي في أيديه العربية.. إيه يا بني؟ قاله أصل أنا كنت وحش أصلاً، بس إنتوا اللي ماكتنوش عارفين.. يا بني ما كُله وحش يا حبيبي، الشيطان دخلك إزاي من المدخل ده؟! إزاي الشيطان يُدْخَلُكَ من مدخل الإحباط؟! يا جماعة لازم نفهم دي، **إيه يعني لو وقعت؟؟** إيه يعني ياعم لو خدتلك مطب كسرلك حاجة في عفشة العربية؟ ماتصلحوا وتكمل يا أخي، إيه يا ابني؟ **يا إخواناً ماتقفوش، لو وقفنوا فترة قوم وكمَل، قوم وكمَل، أوعى تقف أبداً.**

"وَحَاجَّةُ قَوْمُهُ" حاجه.. اللي دارسين تجويد كام حركة؟ 6 حركات **"قَالَ أَتْحَاجُّوَنِي"** كام حركة؟ 14 حركة، فخذوا بالكوا شايفين الكلمة اللي قالها والكلمة اللي قالوها؟ يعني كأن ربنا يقولك هَمَّا لو قالوك 6 كلمات إنت هتقوهم 14 كلمة، يعني يا جماعة الكلمة دي **"أَتْحَاجُّوَنِي"** دي فيها متى سنتنصر.. عارفين متى سنتنصر؟؟ **حينما تكون قوة قلبك في الاقتناع بالحق اللي إنت عليه أقوى من قوة قلب أهل الباطل في الاقتناع باللي هَمَّا عليه.**

عايز عمرو دياب يلتزم على إيدك؟ ممكن بإذن الله، عارف إمتي؟ لما يكون اقتناعك بقعدتك اللي إنت قاعدها دلوقتي دي هي أكثر من اقتناعه بوقفته في حفلة من حفلات دُيِّ قَدَامَ آلاف الشباب، لما تبقى إنت مقتنع بقعدتك دي أكثر من وقفته، ساعتها إنت هتغلبه وساعتها يسمع هو كلامك.

مش هيكسر الباطل غير ناس الحق في قلوبها أعلى من غلو الباطل عند أهل الباطل، والحق في قلوبها أعظم من عظمة الباطل عند أهل الباطل، هَمَّا دول اللي هيكسروه هَمَّا دول اللي هيزيلوه.

إياك والشعور بالوحدة أو الخوف.. أنت مع الله

قال **"أَتْحَاجُّوَنِي فِي اللَّهِ"** في ربنا؟ فتتكر الآية بناعت النمرود **"أَلَمْ تَرَ إِلَى الَّذِي حَاجَّ إِبْرَاهِيمَ فِي رَبِّهِ أَنْ آتَاهُ اللَّهُ الْمُلْكَ إِذْ قَالَ إِبْرَاهِيمُ رَبِّيَ الَّذِي يُحْيِي وَيُمِيتُ قَالَ أَنَا أُحْيِي وَأُمِيتُ قَالَ إِبْرَاهِيمُ فَإِنَّ اللَّهَ يَأْتِي بِالشَّمْسِ مِنَ الْمَشْرِقِ فَأْتِ بِهَا مِنَ الْمَغْرِبِ فَبُهِتَ الَّذِي كَفَرَ وَاللَّهُ لَا يَهْدِي الْقَوْمَ الظَّالِمِينَ"** البقرة: 258 إنت منتش جاي إلا لرب إبراهيم عليه السلام، إنت جاي، إنت الراجل ده عامل زي إيه؟ عارف لما أروح مثلاً لأحمد زويل أحاجه في الفيمتو سكند، أقولوا أنا هناظرك النهاردة في الفيمتو سكند، مين يا بني؟ ده أنا اللي مخترعها، يا بني إنت ولله المثل الأعلى إنت جاي تحاجه في أعلم حاجة هو فيها في الدنيا كلها، إنت منتاش لاقى غير إبراهيم تحاجه في ربنا؟ إبراهيم يا جماعة أعلم الخلق بالله فيقول **"أَتْحَاجُّوَنِي فِي اللَّهِ"** في ربنا؟ إنتوا جايين تكلموني في ربنا؟ إنتوا جايين تتكلموا معايا أنا في ربنا؟ **دا أنا قلبي ده طوفان معرفة لله سبحانه وتعالى،** إنت.. إنت تقدر لو كلمت حد عن ربنا تحببه فيه؟ تقدر لو كلمت حد عن ربنا

تحسسه ربنا عظيم أد إيه؟ لو ماتقدرش يبقى إنت متعرفوش، قولاً واحداً.. لو ماتقدرش يبقى إنت لسه متعرفش ربنا، على أد ما إنت عارفه هتقدر تعرف الناس بيه، لازم يا جماعة قلوبنا تتملئ معرفة بالله.

"قَالَ أَتُحَاجُّونِي فِي اللَّهِ وَقَدْ هَدَانِ" بعد إيه يا حبيبي؟ بعد ما عرفت ربنا خلاص؟ عذراً عرفت ربي "وَقَدْ هَدَانِ وَلَا أَخَافُ مَا تَشْرِكُونَ بِهِ إِلَّا أَنْ يَشَاءَ رَبِّي شَيْئًا" تفويض رهيب، رهيب أنا أي ضرر في حياتي أو نفع من الله سبحانه وتعالى "وَسِعَ رَبِّي كُلَّ شَيْءٍ عِلْمًا" أنا ربي عالم بحالي عشان كده مش هيحصلني حاجة، أنا موقن إن ربنا هيعصمني ما دام عالم بحالي، قمة الأمن بالله، الأمن الرهيب، المؤمن لما يتفكر علم ربنا بحاله يطمئن أوي، يا جماعة مش هيسبني أبداً ما دام عالم بحالي.. أبداً "وَسِعَ رَبِّي كُلَّ شَيْءٍ عِلْمًا أَفَلَا تَتَذَكَّرُونَ" الأنعام:80.

اللي بيحطني جاب الكلام ده منين؟ إبراهيم يا جماعة العلم ده أتفجر في قلبه إزاي؟ يا جماعة إنت فطرتك دي مليانة علم، ربنا أودع في فطرتك كمية معرفة ليه لو اتفجرت هيخرج كنوز رهيبه رهيبه، على القول إن سيدنا إبراهيم متدبر يبقى كان لسه جبريل منزلوش، يا جماعة يعني كان لسه كل ده من التدبر، يعني كل المعاني الرهيبه دي وفتوحات الله في قلبه ورثها من التدبر، على القول بتاع معاذ وابن جرير.

يعني تخيلوا يا جماعة قال "وَكَيْفَ أَخَافُ" الله! شوفوا كلمة "وَكَيْفَ أَخَافُ" دي أخاف إزاي وأنا مع ربنا؟ ساعات الواحد يبص للسما كده يقول يا نهار أبيض بقى اللي خلق كل دي يبقى معايا وأخاف؟ يا إلهي سبحان الله، وكيف أخاف؟ وكيف أحزن؟ وكيف أقنط؟ وكيف أياس؟ إزاي؟؟!! وأنا ليا رب عظيم إزاي يا جماعة، كيف؟ يقول إزاي إنتوا بتفكروا؟ إزاي؟ "وَكَيْفَ أَخَافُ" ده شعار لحياتك "وَكَيْفَ أَخَافُ مَا أَشْرَكْتُمْ وَلَا تَخَافُونَ أَنَّكُمْ أَشْرَكْتُمْ بِاللَّهِ مَا لَمْ يُنَزَّلْ بِهِ عَلَيْكُمْ سُلْطَانًا" اسمع بقى "فَأَيُّ الْفَرِيقَيْنِ أَحَقُّ بِالْأَمْنِ" الأنعام:81 شعار من شعارات الحياة الخطيرة فأى الفريقين؟

واحد: إياك أن تستشعر الوحدة في الطريق أبداً، أوعى تحس إنك لوحدهك أبداً، متحسش إنك لوحدهك، فريقين، فين الفريقين؟ ده أنت واحد غلام واقف قدام بلد، فين الفريقين دول؟! والملايكة اللي مالية الكون والكواكب وكل الكون ده بملك الله وربنا الملك العظيم، إزاي مش حاسس إن همّا فريقين؟ "فَأَيُّ الْفَرِيقَيْنِ أَحَقُّ بِالْأَمْنِ" يعني إنت بتذاكر وبتطيع ربنا وبتقوم الليل، إنت اللي تبقى آمن على مستقبلك أكثر ولا اللي قاعد يذاكر ومبينزلش يصلي الفجر في الجامع!! يعني إنت مع الحق ومع ربنا إنت اللي تبقى آمن أكثر ولا أهل الباطل اللي بيحاربوا الحق!! مين يا جماعة؟؟

أي الفريقين أحق بالأمن؟؟ يا جماعة إزاي المفاهيم تنتكس في نظرنا إزاي؟؟ إزاي اللي بتخاف على وقتها من العبادة على مذاكرتها وامتحاناتها؟! واللي بيخاف على امتحاناته من الدعوة إزاي يا جماعة؟! أي الفريقين أحق بالأمن؟! اللي أجتهد في الطاعة والعبادة والدعوة وحفظ القرآن هو اللي ربنا يأمنلوا مستقبله ودُنَيْته أكثر ولا اللي حياته كلها أسباب بس!! إزاي يا إخواناً إزاي؟ دا إنت صلاة الفجر بتاعتك أيام الامتحانات وقيام الليل مهما كانت الظروف ده سر فتح ربنا عليك، إزاي تفرط في سر معية ربنا ليك؟ أسباب إيه اللي حتتنفعك لو ربنا مش معاك؟ "فَأَيُّ الْفَرِيقَيْنِ أَحَقُّ بِالْأَمْنِ" خدوا بالكم بقى هنا في قاعدة خطيرة جداً إن حياتك لازم تبقى نقلات.

القاعدة الثانية عشر: حياتك لا بد أن تكون نقلات

سيدنا إبراهيم عليه السلام كان من شوية واحد لوحده، في صومعة لوحده، فكان منعزل قاعد يتدبر، كل اللي همه قلبه، دلوقتي واحد واقف في وش الناس قاعد يدعوا إلى الله يعني في نقلة أهو يا جماعة، يعني **متتحسش في مرحلة، إنت لازم حياتك تبقى نقلات**، يا حبيب قلبي إنت أول ما بتلتزم بتجيب على الأول، الأول ده إيه؟ أنا بقى هشوف قيام الليل، وأقرأ قرآن، وأشوف الصحبة الصالحة.. دي النقلة الأولى..

طب بعد فترة لازم تجيب الثاني بقى، إيه الثاني ده؟ تبدأ بقى تطلب فقه وعقيدة، نبدأ نحضّر دروس الشيوخ زي الشيخ مصطفى العدوي مثلاً، زي الشيخ محمد حسان، نبدأ بقى نعلو بقى شوية..

لازم تجيب الثالث.. إيه الثالث ده؟ أشتغل في الدعوة بقى، وابدأ أدعو الناس، وأبقى جاي بخيري كده دائماً في كل مكان رايحه، وأبقى بؤرة هداية مُشعّة في كل مكان، سراج منير في كل مكان، وأتعلم الرحمة والحكمة والعلم، وابدأ أسمع شرايط بس مش بس عشان نفسي وعشان أنقلها للناس، وابدأ أشيل همّ الدين شوية..
وتجيب الرابع.. الرابع أجاهد في العراق ولا أفغانستان، تروح تجاهد هناك بقى في سبيل الله.

يبقى إنت حياتك لازم تبقى نقلات، ماينفعش تقف عند نقلة واحدة، لازم يا إخواناً حياتنا تبقى كده، إنما الناس اللي تبقى محبوسة في نقلة واحدة ليه؟؟ ليه تفضل محصور في نقلة واحدة؟! لازم تتطور.

سيدنا إبراهيم عليه السلام شايفين كل فترة في حياته تبقى مرحلة جديدة، ليه؟ **لأنه مُنطَلِق**، إنما إنت لسه محبوس جوا نفسك التزمت، تسعين في المية من الملتزمين التزم وقام محبوس في أول خطوة، ليه؟؟ اتشاكل في مشاكل في البيت، اتشاكل في مشاكل في الكلية، مش عارف يخلص من همّ الدنيا، اتشاكل في عقد عمل، **يا بني الحاجات دي مهياش معوقات**، **يا بني الحاجات دي حاجات إنت بتمشى حياتك وهي موجودة ولازم توطن نفسك عليها**، ودينك يفضل ثابت.

هو يا جماعة الواحد هيتجنن والله ماينفعش يبقى فيه تاجر وملتزم؟؟ يا إما قبل ما يتاجر قعد يقوم الليل ويصوم النهار وأول ما يتاجر ينتكس ويبقى حالته والعياذ بالله تحس أنه أفسد من الناس اللي من غير ذقن، هو ماينفعش يا جماعة يبقى طالب ويبذاكر وملتزم ليه؟ لبيه؟ يا طالب مستبيع وقاعد على طول؟ يعني إحنا طبعاً منكرش على اللي بيتفرغ للدين بس أنا قصدي يا إما مطلق الدنيا بالتلاتة، يا إما قاعد يذاكر لا دعوة ولا دروس ولا قيام ليل، **هو ماينفعش يا جماعة تتوازن؟**

لازم الحول الفكري اللي عندنا مع الدين والدنيا؟ لازم أول ما نشوف الدنيا نقوم محولين، **ماينفعش ليه يا إخواناً؟** ما عبد الرحمن بن عوف كان بيتاجر ومايبتاخرش لا على الدروس ولا عن جلسات النبي عليه أفضل الصلاة والسلام ولا عن القيام ولا عن الجهاد ولا عن الدعوة ولا عن الإنفاق، ليه يا جماعة ليه نماذجنا كده؟ دائماً مفيش اللي عارف إن الدنيا ماتصرفهوش عن الدين، أصل إنت مش هتقدر تستغنى عن الدنيا، هتستغنى عنها إزاي؟ هتسقط مثلاً؟ هتقول

لأمك وأبوك معلش والله أنا مش عايز شهادة؟ لما تتخرج مش عاوز تجوز؟ ولا عايز أشتغل؟ ماهي دنيا يا جماعة إحنا ماشين فيها وخلص..

آه دُنيا إنت ماشي فيها بجوارحك إنما قلبك إزاي قلبك يتعطل إزاي؟ الواحد بيحزن والله العظيم، أنا كنت حوالى ثلاثين أخ تاجر، كنت في وقت من الأوقات كنت أدخل المسجد ألاقي ثلاثين أخ ملتحي واقفين وكان بدايتهم اتنين إخوة التزموا ودعوا كل دول، ثلاثين أخ الثلاثين دخلوا في التجارة اللي فضل منهم دلوقتي ملتحي اتنين أو ثلاثة اللي ملتحين لغاية دلوقتي، إيه يا جماعة هو في إيه؟ ليه الدنيا أول ما بتيجي بنضيع ديناً؟ ما ينفعش تسافر عقد عمل وتفضل برضو تشتغل للدين؟ ويفضل إيه؟ ما ينفعش أيام الامتحانات يفضل عبادتك وقيامك ليه؟ هو إنت لو ساعة راحت منك في الدعوة ولا في سماع شريط، حصل لازم نتعلم الصلابة في الدين وده إن شاء الله قاعدة هكلمك عنها بعد كده إن شاء الله من أخطر القواعد اللي هنطبقها هتبقى من أخطر القواعد اسمها الجندية في الالتزام.

الالتزام ده مش لعب، مش هوى، مش قهوة، مش بمزاجك، مش يوم تقعد جلسة الضحى ويوم ماتصليش حتى ركعتين ضحى، مش يوم تقوم الليل ساعتين، وأسبوع ماتصليش حتى الوتر.. لااااا، لازم ثوابت ومبادئ. المقصد يا إخواني في الله المقصد "فَأَيُّ الْفَرِيقَيْنِ أَحَقُّ بِالْأَمْنِ" يبقى قلنا "فكرة النقالات" النقالات يعني حياتك لازم تبقى نقالات.

الدعوة إلى الله جزء من تربيتك القلبية

والنقطة اللي هختم لكم عندها بإذن الله سبحانه وتعالى إن إنتوا لاحظوا معايا ملاحظة خطيرة جداً، سيدنا إبراهيم لما اجتهد في العبادة ربنا فتح على قلبه فتوحات ولا لأ؟ فتوحات "لا أَحِبُّ الْآفِلِينَ"، وفتوحات "لَسْنُ لَمْ يَهْدِنِي رَبِّي"، فتوحات "وَجَّهْتُ وَجْهِيَ".

طب لما اجتهد في الدعوة فتح على قلبه فتوحات تانية ولا لأ؟ فتوحات "وَكَيْفَ أَخَافُ"، فتوحات "فَأَيُّ الْفَرِيقَيْنِ أَحَقُّ بِالْأَمْنِ"، فتوحات "وَتِلْكَ حُجَّتُنَا آتَيْنَاهَا" الأنعام: 83 يبقى سيدنا إبراهيم لما اجتهد في العبادة جت فتوحات قلبية، أما اجتهد في الدعوة جت فتوحات قلبية تاني.

عايز تقول إيه؟ عايز أقولكم حاجات خطيرة جداً، إيه؟ إن الدعوة إلى الله جزء من تربيتك القلبية، أوعى توسوس، أصل أنا لما بنشغل بالناس قلبي بيوظ، يابني إنت في مقامات إيمانية إنت مش هتشم ربحتها غير لو شلت همّ الدين، غير لو نزلت تكلم الناس عن ربنا، إنت في مقامات في معرفة الله، إنت والله ما هتعرف عنها حاجة إلا لو اشتغلت في الدعوة.

يا جماعة التربية القلبية دي كل حاجة في الدين بتؤثر في قلبك، عبادتك بتؤثر في قلبك، دعوتك بتؤثر في قلبك، طلبك للعلم، لو ما طلبت علم في مقامات عمرك ما هتشم ريجتها ولا هتعرّفها، لو ما اتصلت بالعلماء في مقامات عمرك ما هتعرّفها.

كن صادقاً وانطلق.. لا تنتظر أحد

يعني إيه؟ أنا عايز أقول لكم في نهاية اللقاء إن كل واحد فينا لازم يصدّق في الوصول إلى الله، سيدنا إبراهيم عليه السلام "جَنَّ عَلَيْهِ عَلَيْهِ: أي لوحده ما استناش حد. أوعى إنت مش لاقى مُرِّي تروح جهنم، إنت مش لاقى واحد يحفظ معاك قرآن تروح جهنم، تضيع، مش لاقى واحد يشجعك في الدعوة إلى الله في الجامعة تضيع الدنيا إزاي؟ مش لاقى واحد يروح معاك الدرس منتاش رايح الدرس تستثقل، ماتستناش حد "سبق المفردون" صحيح مسلم مين المفردون؟ المفردين اللي هما ما استنوش حد، سيدنا إبراهيم عليه السلام ما استناش حد، انطلق ولكن هذا لا يعني إنك مش محتاج لصحبة توصل بيها إلى ربنا لازم، لازم صحبة توصل بيها إلى ربنا.

لا بد من رفقة صالحة تعينك على الطاعة

علشان كده ربنا بيقول "اهْدِنَا الصِّرَاطَ الْمُسْتَقِيمَ" الفاتحة:6 ليه مش اهديني؟ لأنّ محدش هيوصل لربنا لوحده، إنت مش هتوصله لوحده أبداً لازم وسط بيئة إيمانية وسط صحبة إيمان، وسط حد يوجهك وحد يربيك وحد يتابعك، وصحبة صالحة تسبقك.

يا جماعة ده الواحد بيتعرّف على أخ مُلتزم بتقعد معاه عشر دقائق يرفع إيمانك عشر سنين، والله العظيم مرة قعدت مع أحد الإخوة اللي يعتبرهم من شيوخى وموجهيني، والله العظيم يا جماعة قعدت معاه عشر دقائق حسيت إن أنا قلبي لأول مرة في حياتي ساجد تحت العرش، كلمني كلمتين عن سيدنا إبراهيم كنت أنا في خامسة كلية، كلمني كلمتين عن سيدنا إبراهيم حسيت إن قلبي ساجد تحت العرش، إنت لازم يا حبيب قلبي الصحبة، لازم تكون ليك صحبة.

إيه؟ أنا أصحاب المُلتحين؟ وأنا أصحاب المنقبات؟ يا حبيب قلبي الملتزم مش معناه الملتحي والمنقبة، يا جماعة ده مفهوم فاسد مفهوم مختل، المجتهد.. صاحب المجتهد، صاحب الأخ اللي بيحفظ قرآن، صاحب الأخ المجتهد في الدعوة، صاحبي الأخت اللي شغالة في الدعوة، صاحب صاحبك اللي بيطلب العلم، ما تصاحبش واحد مُلتحي على ما تفرج، ماتصاحبش واحدة منقبة وتحت النقاب نقاب، صاحبوا المجتهدييين، اللي لما تشوفه دمك يولع من كتر السخونة، همّا دول اللي هيوصلوك.

في آخر الربع ربنا يقولك "ذَلِكَ هُدَى اللَّهِ" الإيمانيات والمقامات دي كلها مش هتاخذها غير من ربنا "يَهْدِي بِهِ مَنْ يَشَاءُ مِنْ عِبَادِهِ وَلَوْ أَشْرَكُوا لَحَبِطَ عَنْهُمْ مَا كَانُوا يَعْمَلُونَ" الأنعام:88 أوعى تتغير، أوعى تتبدل، أوعى قلبك يلتفت عنه، لو التفتت هتضيع كل حاجة.

همّا دول اللي ربنا بيصطفيهم

"أُولَئِكَ الَّذِينَ آتَيْنَاهُمُ الْكِتَابَ وَالْحُكْمَ وَالنُّبُوَّةَ" هُمَا دول اللي ربنا بيستعملهم، اللي في قلبهم المعاني دي، لما ربنا بيصطفى بيصطفيهم، إحنا قاعدين أهو إخوة وأخوات لو منا عشرة أو عشرين أخ وأخت هيصطفوا بكرة دُعاة إلى الله هما أطهر عشرين قلب فينا، يا جماعة خدوا بالكم يا جماعة "أُولَئِكَ الَّذِينَ آتَيْنَاهُمُ الْكِتَابَ وَالْحُكْمَ وَالنُّبُوَّةَ" هُمَا دول اللي بفتح عليهم، هما دول اللي بستعملهم، هما دول اللي بختارهم، هما دول اللي بصنعهم لنفسي وأصطنعهم على عيني، هما دول اللي بأعيننا، هما دول يا جماعة "فَإِنْ يَكْفُرْ بِهَا هَؤُلَاءِ فَقَدْ وَكَلْنَا بِهَا قَوْمًا لَّيْسُوا بِهَا بِكَافِرِينَ" الأنعام:89 خليك من دول، خليك من اللي ما بيكفرش بالطريق ده أبدًا، خليك ثابت على الطريق ده، خلي السنين ثمر وانت على الطريق ده ماتسيبوش أبدًا.

قدوتك الحقيقية.. قصص الأنبياء في القرآن

"ذَلِكَ هُدَى اللَّهِ" الأنعام:88 "أُولَئِكَ الَّذِينَ هَدَى اللَّهُ فَبِهِدَاهُمُ اقْتَدِهْ" اقتده مش اقتدِ الهاء اللي في الآخر دي علماء اللغة بيسموها "هاء السكت" يعني إيه هاء السكت؟ يعني دول وبس، مالكش قدوة غيرهم، مالكش قدوة غير قصص الأنبياء اللي في القرآن، ده هُمَا دول، ما تاخذش قدوتك من أي حد ولا من أي مذهب فلسفي أو أي مذهب ضال، هُمَا دول قدوتك.

"قُلْ لَا أَسْأَلُكُمْ عَلَيْهِ أَجْرًا" ده كله مَنْ من ربنا، ربنا هيعطيه لي وأنا آخذ منكم فلوس عليه "إِنَّ هُوَ إِلَّا ذِكْرَى لِلْعَالَمِينَ" الأنعام:90.

لا بد أن تعي جيدًا قواعد السير إلى الله

ياترى يا جماعة إن اللي في قلوبنا دلوقتي من قواعد السير إلى الله، الفتح على قدر حال قلبك مع الله، الفتح على قدر الهم، إياك أن تقنع بجد في علاقتك مع الله ورجبتك إلى الله، الفتح على قدر المُجاهدة، الفتح على قدر الافتقار، لا بد من التمحيص فانتبه!!

لازم حياتك تبقى نقلات مستمرة لا تتوقف أبدًا، للدعوة فتوح وأنوار، كما للعبادة فتوح وأنوار، لازم يا جماعة القواعد دي تتمزج بلحمنا ودمنا لازم يا جماعة، لو ربنا ما وركش ما انتاش هتشوف، لازم يا إخوانًا توحيد الوجهة إلى الله، علو الهمة في طلب الحق، كل ده قواعد وغيرها سمعناها مع بعض الليلة.

لا بد من التطبيق العملي لما تعلمته

يعني أتمنى إنَّ عشان نفهم الكلام اللي إحنا قلناه ده لازم نطبق عملي، نطبق عملي إزاي؟ الآيات قالت لنا الربع اللي بعده على طول أوله إيه؟ "إِنَّ اللَّهَ فَالِقُ الْحَبِّ وَالنَّوَى" الأنعام:95 يعني إيه؟ شوط كامل بيكلمك عن ملكوت السماوات والأرض يعني إيه؟ يعني ربنا بيقولك شوف بقى إنَّ إبراهيم لما تدبر في ملكوت السماوات والأرض وصل لكل ده، عايز توصل فتححتها لك، آه يلا في الربع فتححتها لك، شوف بقى إنت لما تتدبر هتوصل لإيه من اللي وصله؟ يبقى الربعين مربوطين ببعض ده الترجمة العملية النموذج العملي اللي اتأثر.

بعد كده الامتحان بقى اللي إنت هتمتحنه في الربع اللي بعد كده، شوف إنت هتطبق إيه بقى؟ وهتوصل من الآيات لإيه من اللي وَصَلَهُ سيدنا إبراهيم؟ الرُّبُوع يتصلى بيهم يا جماعة قيام.

عيش بقلبك مع القرآن

الرُّبُوعين دول والله العظيم الربع ده أنا أعتقد ومحدش يعرف اللي في قلبي غير ربنا إن ده أحب ربع إلى قلبي في القرآن واللي يعني مهما اتكلمت عنه يعني الواحد مايقدرش يعبر عن اللي في قلبه له، وأيام الكلية كان الربع ده من الحاجات اللي صبرت الواحد على الابتلاءات والهموم والمعارضات اللي في البيت، والمشاكل والفتن اللي برا البيت، لما كنت تقرأ كده تشوف إيه ده؟ إيه معرفة الله اللي قلبت الحياة؟ ده إيه النماذج الرهيبة دي؟ إيه علو الهمة ده في الوصول إلى الله؟ ده كان الواحد بيحس إنه بيتشحن علشان يوصل لربنا، ويفضل مُخلص لربنا في الطريق، ويفضل وجهته هي ربنا سبحانه وتعالى.

عايزين نقرأها بقلوبنا يا جماعة، عايزين نعيش مع القرآن، أنا قلت لكم إن هدف السلسلة ده إن إحنا نعيش مع القرآن، نعيش معا.

دعاء الخاتمة

اللهم تب علينا لتتوب، اللهم تب علينا لتتوب، اللهم تب علينا توبةً ترضى بما عنا، اللهم أصلح لنا قلوبنا، اللهم طهر لنا قلوبنا، اللهم املأ قلوبنا بما ملأت به قلوب عبادك الصالحين، اللهم أفض على قلوبنا بما أفضت به على قلوب عبادك المخلصين، اللهم اجعلنا مسلمين لك سلمًا لك مُخلصين لك، اللهم أخلص أعمارنا لك، وأخلص أوقاتنا لك، وأخلص حياتنا لك، اللهم لا تجعل في قلوبنا إلاك، اللهم لا تجعل في قلوبنا إلاك، اللهم لا تجعل همنا إلا رضاك، ولا تجعل رغبتنا إلا إليك، ولا تجعل توكلنا إلا عليك، واملاً قلوبنا حبًا لك ورضًا بك ويقينًا بك وثقةً فيك وإنابةً وإخبارًا إليك..

يارب وقفنا على بابك، اللهم طهر قلوبنا، اجعل في قلوبنا نورًا وفي ألسنتنا نورًا وفي أسماعنا نورًا وفي أبصارنا نورًا، اللهم إنا نسألك خير هذه الليلة فتحتها ونصرها ونورها وبركتها وهداها ونعوذ بك من شر ما فيها وشر ما بعدها، اللهم لا تُردنا على أعقابنا مُنتكسين، اللهم لا تُردنا عن الهدى بعد أن أريننا إياه، اللهم أرنا الحق حقًا وارزقنا اتباعه وأرنا الباطل باطلًا وارزقنا اجتنابه، يارب أسكن عظمة القرآن في قلوبنا، يارب اجعله ربيع قلوبنا، يارب اجعله نور صدورنا، يارب اجعله جلاء أحزاننا، يارب اجعله ذهاب همومنا وغمومنا يارب..

ولا تحرمنا من قيام الليل بين يديك، ولا تحرمنا من وقوف الثلث الأخير بين يديك، افتح على قلوبنا في قيام الليل، افتح على قلوبنا في تلاوة القيام، وفي ركوع القيام، وفي سجود القيام، وفي استغفار الأسحار، يارب إن شئت اهدنا، إن شئت رفعتنا، إن شئت أخلصتنا لك، يارب اهدنا واهد بنا، واستعملنا ولا تستبدلنا يارب برحمتك يا أرحم الراحمين.

سبحانك اللهم وبحمدك، أشهد أن لا إله إلا أنت، أستغفرك وأتوب إليك.

تم بحمد الله

شاهدوا الدرس للنشر على النت في قسم تفريغ الدروس في [منتديات الطريق إلى الله](#) وتفضلوا هنا :-

<http://forums.way2allah.com/forumdisplay.php?f=36>